



**Zakon o Vijeću ministara Bosne i Hercegovine**  
(Neslužbeni prečišćeni tekst)

**Autentično tumačenje Zakona o izmjenama i dopunama  
Zakona o Vijeću ministara Bosne i Hercegovine**

**Poslovnik o radu Vijeća ministara Bosne i Hercegovine**







**Vijeće ministara Bosne i Hercegovine**  
**Generalni sekretarijat VMBiH**  
**Služba za informiranje**

Za izdavača:

**Robert Vidović,**  
**generalni sekretar VMBiH**

Glavna urednica:

**Bojana Vujičić,**  
**rukovodilac Službe za informiranje**

Urednik:

**Aleksandar Obradović,**  
**šef Odsjeka za odnose s javnošću**

Priredila:

**Nađa Čiča,**  
**šef Odsjeka za opće poslove**

Lektor za bosanski jezik:

**Indira Osmić**

DTP i štampa:

**Impressum Nova Bila**

**Sarajevo, 2022. godine**



## **Zakon o Vijeću ministara Bosne i Hercegovine** (Neslužbeni prečišćeni tekst)

### **Autentično tumačenje Zakona o izmjenama i dopunama Zakona o Vijeću ministara Bosne i Hercegovine**

### **Poslovnik o radu Vijeća ministara Bosne i Hercegovine**





# ZAKON O VIJEĆU MINISTARA BOSNE I HERCEGOVINE

(<sup>1</sup>Neslužbeni prečišćeni tekst)

## PRAVA I DUŽNOSTI VIJEĆA MINISTARA

### Član 1.

Ovim zakonom uređuju se, u skladu s Ustavom Bosne i Hercegovine, prava, dužnosti i odgovornosti Vijeća ministara Bosne i Hercegovine (u daljnjem tekstu: Vijeće ministara), njegovo ustrojstvo, način rada i odlučivanja, prava i dužnosti predsjedavajućeg, zamjenika predsjedavajućeg i članova Vijeća ministara, kao i odnos Vijeća ministara u vršenju funkcija prema drugim tijelima vlasti Bosne i Hercegovine.

### Član 2.

Vijeće ministara je organ izvršne vlasti Bosne i Hercegovine koji vrši svoja prava i dužnosti kao vladine funkcije, u skladu s Ustavom BiH, zakonima i drugim propisima Bosne i Hercegovine.

---

<sup>1</sup>Neslužbeni prečišćeni tekst zakona sadrži: Odluku kojom se donosi Zakon o Vijeću ministara Bosne i Hercegovine – Visoki predstavnik za Bosnu i Hercegovinu (“Službeni glasnik BiH”, broj 38/02); Zakon o Vijeću ministara Bosne i Hercegovine (“Službeni glasnik BiH”, broj 30/03); Zakon o izmjenama i dopunama Zakona o Vijeću ministara Bosne i Hercegovine (“Službeni glasnik BiH”, broj 42/03) – označeno **podabljanim slovima**; Zakon o izmjenama i dopunama Zakona o Vijeću ministara Bosne i Hercegovine (“Službeni glasnik BiH”, broj 81/06) – označeno **podvučenim slovima**; Zakon o izmjenama i dopunama Zakona o Vijeću ministara Bosne i Hercegovine (“Službeni glasnik BiH”, broj 81/06) – označeno *kosim slovima*; Zakon o izmjenama i dopunama Zakona o Vijeću ministara Bosne i Hercegovine (“Službeni glasnik BiH”, broj 76/07) – označeno **podabljanim kosim slovima**; Odluku o donošenju Zakona o izmjenama i dopunama Zakona o Vijeću ministara Bosne i Hercegovine – Visoki predstavnik za Bosnu i Hercegovinu (“Službeni glasnik BiH”, broj 81/07) – označeno **podabljanim podvučenim slovima** i Zakon o izmjeni Zakona o Vijeću ministara Bosne i Hercegovine (“Službeni glasnik BiH”, broj 24/08) – označeno *kosim podvučenim slovima*.

Ovaj neslužbeni prečišćeni tekst služi samo za internu upotrebu i na njega se ne može pozivati prilikom službene upotrebe.



### Član 3.

Sjedište Vijeća ministara je u Sarajevu.

### Član 4.

Vijeće ministara potpunije uređuje svoje unutrašnje ustrojstvo, kao i djelokrug i ovlaštenja službi koje obrazuje radi djelotvornog izvršavanja poslova iz svog djelokruga rada.

## SASTAV VIJEĆA MINISTARA

### Član 5.

(1) Vijeće ministara, u skladu s Općim okvirnim sporazumom za mir, i posebno članom III Aneksa 4. toga sporazuma (u kojem su predviđene odgovornosti i odnosi između institucija Bosne i Hercegovine i entiteta), čine predsjedavajući i ministri, i to:

- ministar vanjskih poslova,
- ministar vanjske trgovine i ekonomskih odnosa,
- ministar finansija i trezora,
- ministar komunikacija i prometa,
- ministar civilnih poslova,
- ministar za ljudska prava i izbjeglice,
- ministar pravde,
- ministar sigurnosti,
- **ministar odbrane.**

(2) Radi boljeg i efikasnijeg izvršavanja vladinih funkcija, predsjedavajući Vijeća ministara ima ovlaštenja da imenuje dva ministra za zamjenike predsjedavajućeg Vijeća ministara, koji stupaju na dužnost nakon što njihovo imenovanje odobri Predstavnički dom kao dio postupka odobravanja iz člana 10. ovog zakona.

(3) Mandat Vijeća ministara je isti kao mandat Parlamentarne skupštine Bosne i Hercegovine.





## Član 6.

- (1) Ukupni sastav Vijeća ministara će u toku cijelog mandata biti u potpunosti u skladu s Ustavom Bosne i Hercegovine, naročito njegovim čl. V.4.(b) i IX.3., te će se u skladu s tim u sastavu Vijeća ministara osigurati jednaka zastupljenost konstitutivnih naroda Bosne i Hercegovine.
- (2) Predsjedavajući Vijeća ministara i zamjenici predsjedavajućih su iz različitih naroda.
- (3) U sastav Vijeća ministara ili na dužnosti generalnog sekretara Vijeća ministara iz člana 24. ovog zakona mora se osigurati najmanje jedno mjesto za pripadnike ostalih.

## Član 7.

- (1) Svaki ministar ima jednog zamjenika ministra, **osim ministra odbrane, koji ima dva zamjenika ministra.**
- (2) Zamjenici ministara su iz različitih konstitutivnih naroda u odnosu na ministra.
- (3) **Ako drugačije nije predviđeno ovim zakonom** zamjenici ministara zamjenjuju ministre u slučaju njihove odsutnosti ili spriječenosti da obavljaju dužnost.
- (4) **Zamjenik ministra koji učestvuje na sjednici Vijeća ministara umjesto odsutnog ministra u skladu sa stavom (3) ovog člana, ima pravo odlučivati u njegovo ime po svim ili po pojedinim pitanjima u skladu sa ovlaštenjem koje mu odsutni ministar prenese i koji o tome pismeno obavijesti predsjedavajućeg Vijeća ministara.**

## Član 8.

Osim ministra koji je odgovoran za rad ministarstva u cjelini i zamjenika ministra, sa pravima i dužnostima iz prethodnog člana ovog zakona, svako ministarstvo ima i sekretara ministarstava, koji obavlja poslove i zadatke utvrđene Zakonom o državnoj službi u institucijama Bosne i Hercegovine i čije imenovanje se vrši u skladu sa odredbama tog zakona i uz uvažavanje principa sadržanih u članu 6. ovog zakona.



## IMENOVANJE, ODOBRAVANJE I SMJENJIVANJE VIJEĆA MINISTARA

### Član 9.

- (1) Predsjedavajućeg Vijeća ministara imenuje Predsjedništvo Bosne i Hercegovine saglasno postupku utvrđenom ovim zakonom kod svakog novog mandata Parlamentarne skupštine Bosne i Hercegovine, vodeći pri tom računa o principu zastupljenosti iz člana IX.3. Ustava Bosne i Hercegovine.
- (2) Odluka o imenovanju donosi se najkasnije 15 dana nakon održavanja konstituiraјуće sjednice Predstavničkog doma Parlamentarne skupštine Bosne i Hercegovine (u daljnjem tekstu: Predstavnički dom) u novom sastavu.
- (3) Odluka o imenovanju se odmah dostavlja Predstavničkom domu Parlamentarne skupštine Bosne i Hercegovine na odobravanje.
- (4) Predsjedavajući Vijeća ministara stupa na dužnost nakon što njegovo imenovanje odobri Predstavnički dom.
- ~~(5) Potvrda imenovanja predsjedavajućeg Vijeća ministara mora biti završena u roku od trideset (30) dana od dana imenovanja.~~

### Član 10.

- ~~(1) Prema članu V. 4. Ustava Bosne i Hercegovine, predsjedavajući Vijeća ministara, najkasnije u roku od 35 dana od dana kada Predstavnički dom potvrdi njegovo imenovanje, a u skladu s postupkom utvrđenim ovim zakonom, imenuje ministre i zamjenike ministara i traži od Predstavničkog doma potvrdu imenovanja.~~
- (2) Ministri i zamjenici ministara stupaju na dužnost odmah nakon potvrde od strane Predstavničkog doma.
- ~~(3) Potvrda imenovanja zamjenika predsjedavajućeg ministara i zamjenika ministara mora biti završena u roku od trideset (30) dana od dana kada predsjedavajući Vijeća ministara preuzme dužnost.~~



#### Član 10a.

Kandidat za dužnost predsjedavajućeg Vijeća ministara i kandidati za dužnosti ministra i zamjenika ministra imenuju se i potvrđuju saglasno postupku utvrđenom ovom zakonu.

#### Član 10b.

Za predsjedavajućeg Vijeća ministara, ministra i zamjenika ministra ne može se imenovati lice za koje Centralna izborna komisija Bosne i Hercegovine (u daljnjem tekstu: Izborna komisija) utvrdi da ne ispunjava uvjete iz člana 10c. ovog zakona.

#### Član 10c.

Da bi lice moglo biti imenovano, potrebno je da:

a) ispunjava sve potrebne uvjete za izbor kandidata propisane Izbornim zakonom Bosne i Hercegovine i da se na njega ne odnosi nijedna nespojivost dužnosti propisana tim zakonom;

b) je dostavilo sve informacije koje su potrebne Izornoj komisiji da ispuni svoje obaveze iz Zakona o sukobu interesa u institucijama vlasti Bosne i Hercegovine u slučaju da je potvrđeno imenovanje tog lica.

#### Član 10d.

(1) Prije nego što Predsjedništvo Bosne i Hercegovine (u daljnjem tekstu: Predsjedništvo BiH) imenuje predsjedavajućeg Vijeća ministara iz člana 9. ovog zakona, zatražit će od lica koje se imenuje da dostavi sljedeće:

a) potpisanu izjavu na obrascu koji propisuje Izborna komisija u kojoj navodi:

1) podatke o svojoj stručnoj spremi, ranije dužnosti, odnosno poslove koje je obavljalo, kao i odgovornosti koje je imalo u obavljanju tih dužnosti ili poslova;

2) da li je protiv njega izrečena kazna za krivično djelo;



3) da li je protiv njega potvrđena optužnica;

4) podatke o svojoj aktivnosti u periodu od januara 1992. do decembra 1995. godine, uključujući i informacije koje se odnose na zaposlenje, obavljanje političkih dužnosti, kao i angažman u oružanim snagama ili policiji u tom periodu;

5) podatke u vezi sa svojim imovnim stanjem, uključujući i podatke o finansijskim sredstvima i interesima;

6) pristanak da Državna agencija za istrage i zaštitu (u daljnjem tekstu: SIPA) provjeri istinitost informacija datih u potpisanoj izjavi;

7) kontakt-informacije, jedinstveni matični broj, broj lične karte ili broj pasoša,

b) uredno ispunjene obrasce koje propisuje Izborna komisija koji sadrže sve informacije koje su Izornoj komisiji potrebne da utvrdi da li navedeno lice ispunjava sve uvjete propisane u članu 10c. ovog zakona.

(2) Prije nego što predsjedavajući Vijeća ministara imenuje ministra ili zamjenika ministra, zatražit će od lica koje se imenuje dostavljanje svih informacija iz stava 1. ovog člana.

(3) Organ nadležan za imenovanje prosljeđuje SIPA-i bez odgađanja informacije dostavljene na osnovu stava 1. tačke a) ovog člana.

(4) Organ nadležan za imenovanje prosljeđuje Izornoj komisiji bez odgađanja informacije dostavljene na osnovu stava 1. tačke b) ovog člana.

(5) Saglasno članu 3. stav 1. tačka 8. Zakona o Državnoj agenciji za istrage i zaštitu, SIPA provjerava istinitost informacija koje su joj dostavljene na osnovu stava 3. ovog člana i konačan izvještaj podnosi organu nadležnom za imenovanje. Nijedna odredba ovog stava neće se tumačiti, ni direktno ni indirektno, tako da se na bilo koji način ili u bilo kojoj formi proširuju nadležnosti SIPE u sprečavanju, otkrivanju i istraživanju krivičnih djela i/ili da se na neki drugi način SIPA ovlašćuje da obavlja druge zadatke ili nadležnosti osim onih koji se strogo odnose na provjeravanje tačnosti podataka koji se dostavljaju na osnovu ovog stava.

(6) Izborna komisija ocjenjuje, na osnovu informacija koje su joj dostavljene prema stavu 4. ovog člana i podataka iz službene evidencije, da li navedeno lice ispunjava uvjete za imenovanje i potvrdu o tome dostavlja organu nadležnom za imenovanje.

(7) Konačan izvještaj iz stava 5. ovog člana i potvrda o ispunjavanju uvjeta dostavlja se Predsjedništvu BiH najkasnije osam dana, odnosno predsjedavajućem Vijeća ministara najkasnije 30 dana od dana kada su informacije dostavljene SIPA-i, odnosno Izornoj komisiji.



(8) Sve informacije iz ovog člana obrađuju se saglasno Zakonu o zaštiti ličnih podataka.

(9) Svi organi ili lica kojima se SIPA ili Izborna komisija obrate s ciljem izvršavanja svojih obaveza iz ovog zakona u potpunosti će i efikasno s njima saradivati i odmah će im dostaviti svaku informaciju koju zatraže.

(10) Postupak odlučivanja Izborne komisije propisan je Izbornim zakonom Bosne i Hercegovine. Pravni lijekovi propisani Izbornim zakonom Bosne i Hercegovine također se primjenjuju.

### Član 10e.

(1) Najkasnije u roku od dva dana od isteka odgovarajućeg roka utvrđenog članom 10d. stav 7. ovog zakona, Predsjedništvo BiH može nastaviti s postupkom imenovanja predsjedavajućeg Vijeća ministara samo kada se ispune svi sljedeći kriteriji:

a) da je za navedeno lice Izborna komisija utvrdila da ispunjava sve uvjete propisane članom 10c. ovog zakona;

b) smatra da je, na osnovu diskrecione ocjene informacija dostavljenih u potpisanoj izjavi prema članu 10d. stavu 1. tački a) ovog zakona i konačnog izvještaja iz člana 10d. stav 5. ovog zakona, navedeno lice podoban kandidat za dužnost na koju ga Predsjedništvo BiH namjerava imenovati.

(2) Najkasnije u roku od dva dana od isteka odgovarajućeg roka utvrđenog članom 10d. stav 7. ovog zakona, predsjedavajući Vijeća ministara može nastaviti s postupkom imenovanja ministra ili zamjenika ministra samo kada se ispune svi sljedeći kriteriji:

a) da je za navedeno lice Izborna komisija potvrdila da ispunjava sve uvjete propisane članom 10c. ovog zakona;

b) smatra da je, na osnovu diskrecione ocjene informacija dostavljenih u potpisanoj izjavi prema članu 10d. stav 1. tački a) ovog zakona i konačnog izvještaja iz člana 10d. stav 5. ovog zakona, navedeno lice podoban kandidat za dužnost na koju ga predsjedavajući Vijeća ministara namjerava imenovati.



## Član 10f.

(1) U roku utvrđenom članom 9. stav 2. ovog zakona, Predsjedništvo BiH dostavlja Komisiji za pripremu izbora Vijeća ministara Predstavničkog doma Parlamentarne skupštine Bosne i Hercegovine (u daljnjem tekstu: Komisija) ime lica imenovanog za predsjedavajućeg Vijeća ministara, kao i sljedeće informacije:

a) potpisanu izjavu, čiji oblik i sadržaj propisuje Izborna komisija, u kojoj imenovano lice daje podatke iz člana 10d. stav 1. tačke a) alineja od 1) do 6) ovog zakona;

b) službenu potvrdu Izborne komisije da navedeno lice ispunjava sve uvjete iz člana 10c. ovog zakona.

(2) U roku utvrđenom u članu 10. stav 1. ovog zakona, predsjedavajući Vijeća ministara dostavlja Komisiji ime lica imenovanog za ministra ili zamjenika ministra, zajedno sa svim informacijama iz stava 1. ovog člana.

(3) Informacije iz ovog člana bit će dostupne javnosti.

## Član 10g.

(1) Na osnovu informacija dostavljenih saglasno članu 10f. ovog zakona, Komisija odlučuje da li preporučuje Predstavničkom domu potvrdu izbora kandidata.

(2) Kada ocjenjuje kandidata za dužnost predsjedavajućeg Vijeća ministara, Komisija daje preporuku najkasnije u roku od tri dana od dana kada je primila informacije. Za ocjenjivanje kandidata za dužnost ministra, odnosno zamjenika ministra, rok za davanje preporuke je osam dana.

(3) Komisija može odlučiti, u rokovima iz stava 2. ovog člana, da održi sjednicu na kojoj će postavljati pitanja imenovanom licu vezano za informacije iz člana 10f. ovog zakona i u pogledu njegove podobnosti za obavljanje poslova na položaju za koji se predlaže.

(4) Svaka preporuka Komisije Predstavničkom domu ukazuje na broj glasova protiv kao i razloge za takve glasove.

(5) Postupak ocjenjivanja referenci kandidata propisan ovim članom provodi se saglasno Poslovniku Predstavničkog doma.



## Član 10h.

Predstavnički dom donosi odluku o potvrđivanju lica imenovanih na dužnosti predsjedavajućeg Vijeća ministara, ministara i zamjenika ministara u roku od tri dana od dana kada je primio preporuku Komisije.

## Član 10i.

(1) Postupak imenovanja i potvrđivanja predsjedavajućeg Vijeća ministara, propisan ovim zakonom, bit će završen najkasnije u roku od 22 dana od konstituirajuće sjednice Predstavničkog doma.

(2) Postupak imenovanja i potvrđivanja ministara i zamjenika ministara, propisan ovim zakonom, bit će završen najkasnije u roku od 70 dana od konstituirajuće sjednice Predstavničkog doma.

## Član 11.

(1) Ako Predstavnički dom ne potvrdi odluku Predsjedništva BiH o imenovanju predsjedavajućeg Vijeća ministara, Predsjedništvo BiH je dužno u roku od osam (8) dana imenovati drugog predsjedavajućeg Vijeća ministara i takvu odluku dostaviti na potvrdu Predstavničkom domu.

(2) Ako Predstavnički dom ne potvrdi odluku predsjedavajućeg Vijeća ministara o imenovanju ministra ili zamjenika ministra, predsjedavajući Vijeća ministara dužan je u roku ne dužem od osam (8) dana imenovati drugu osobu na to mjesto i takvu odluku dostaviti na potvrdu Predstavničkom domu, ili podnijeti ostavku.



## Član 11a.

(1) Smatra se da je Vijeće ministara uspostavljeno i operativno kada se ispune sljedeći uvjeti:

a) da je predsjedavajući Vijeća ministara imenovan i potvrđen saglasno zakonu;

b) da je broj ministara i zamjenika ministara koji su imenovani i potvrđeni saglasno zakonu dovoljan da se osigura da Vijeće ministara može održavati sjednice i donositi odluke ili postupati saglasno ovom zakonu.

(2) Dok Vijeće ministara ne bude uspostavljeno i operativno saglasno stavu 1. ovog člana, dotadašnje Vijeće ministara ostaje u tehničkom mandatu.

## Član 12.

(1) Predsjedavajući Vijeća ministara može podnijeti ostavku bez obrazloženja.

(2) Predsjedavajući Vijeća ministara podnosi ostavku Predsjedništvu BiH.

(3) Ako predsjedavajući Vijeća ministara podnese ostavku ili ako je trajno spriječen da vrši svoju dužnost, Vijeće ministara daje ostavku u cjelini, a dužnost obavlja do potvrde novog predsjedavajućeg i članova Vijeća ministara. U tom slučaju primjenjuje se postupak iz čl. 9. i 10. ovog zakona.

## Član 13.

Predsjedništvo BiH može predložiti smjenu predsjedavajućeg Vijeća ministara. Ako Parlamentarna skupština BiH izglasa nepovjerenje predsjedavajućem, Vijeće ministara daje ostavku u cjelini, ali dužnost obavlja do potvrde novog predsjedavajućeg i članova Vijeća ministara. Parlamentarna skupština također može, na svoju inicijativu, izglasati nepovjerenje Vijeću ministara. U oba slučaja primjenjuje se postupak iz čl. 9. i 10. ovog zakona.



## Član 14.

- (1) Ministri i zamjenici ministra mogu podnijeti ostavku bez obrazloženja.
- (2) Ministri i zamjenici ministra podnose ostavku predsjedavajućem Vijeća ministara.
- (3) Ako ministar ili zamjenik ministra podnese ostavku ili ako je trajno spriječen da vrši svoju dužnost, predsjedavajući Vijeća ministara imenuje njegovog nasljednika, **najkasnije u roku od 15 dana od dana podnošenja njegove ostavke i/ili od dana kada je ustanovljeno da je ministar ili zamjenik ministra trajno spriječen da vrši svoju dužnost.** Nasljednik ministra ili zamjenika ministra preuzima dužnost nakon što ga potvrdi Predstavnički dom u skladu sa postupkom predviđenim članom 10. ovog zakona.

### **(4) Zamjenik ministra privremeno obavlja dužnosti ministra tokom perioda između:**

**a) dana kada ministar podnese ostavku i dana kada nasljednik navedenog ministra preuzme dužnost u skladu s postupkom predviđenim ovim zakonom; ili**

**b) dana kada se ustanovi da je ministar trajno spriječen da vrši svoju dužnost i dana kada nasljednik navedenog ministra preuzme dužnost u skladu s postupkom predviđenim ovim zakonom.**

**(5) U slučaju da privremeno vršenje dužnosti iz stava (4) ovog člana nastane u vezi s ostavkom ministra odbrane ili ustanovljenje trajne spriječenosti vršenja dužnosti nastane u vezi s ministrom odbrane, predsjedavajući Vijeća ministara će odrediti koji od zamjenika ministra odbrane će privremeno obavljati dužnosti navedenog ministra tokom odnosnog perioda propisanog u stavu (4) ovog člana.**

## Član 15.

(1) Predsjedavajući Vijeća ministara može pokrenuti postupak za smjenu ministra i zamjenika ministra. Ako Parlamentarna skupština donese odluku o potvrdi smjene ministra ili zamjenika ministra, predsjedavajući Vijeća ministara dužan je u skladu s postupkom predviđenim članom 10. ovoga zakona imenovati novog ministra, odnosno zamjenika ministra.

(2) Novoimenovani ministar, odnosno zamjenik ministra preuzima dužnost nakon potvrde Predstavničkog doma.



**(3) Ako Parlamentarna skupština Bosne i Hercegovine donese odluku o potvrdi smjene ministra u skladu sa stavom (1) ovog člana, zamjenik ministra će privremeno obavljati dužnosti navedenog ministra tokom perioda između dana donošenja navedene odluke o potvrdi i dana kada novoimenovani ministar preuzme dužnost u skladu s postupkom predviđenim ovim zakonom.**

**(4) Ako Parlamentarna skupština Bosne i Hercegovine donese odluku o potvrdi smjene ministra odbrane u skladu sa stavom (1) ovog člana, predsjedavajući Vijeća ministara će odrediti koji zamjenik ministra će privremeno obavljati dužnosti navedenog ministra tokom perioda između dana donošenja navedene odluke o potvrdi i dana kada novoimenovani ministar preuzme dužnost u skladu s postupkom predviđenim ovim zakonom.**

## NAČIN RADA I ODLUČIVANJA

### Član 16.

- (1) Članovi Vijeća ministara obavezni su sudjelovati u radu Vijeća ministara.
- (2) Vijeće ministara radi i odlučuje u sjednicama. **Po pravilu, sjednice Vijeća ministara održavaju se najmanje jednom sedmično, osim u opravdanim slučajevima utvrđenim u Poslovniku Vijeća ministara Bosne i Hercegovine. Ako suprotno odredbama ovog zakona i odredbama navedenog Poslovnika predsjedavajući Vijeća ministara ne sazove dvije uzastopne sjednice Vijeća ministara, sjednicu će zajednički sazvati zamjenici predsjedavajućeg.**
- (3) Vijeće ministara može održati sjednicu i odlučivati ako sjednicama prisustvuje više od polovine članova Vijeća ministara. **od kojih, vodeći računa o članu IX.3. Ustava Bosne i Hercegovine, najmanje po dva iz svakog konstitutivnog naroda.**
- (4) Pripreme i način održavanja i vođenja sjednica Vijeća ministara uređuju se potpunije Poslovníkom o radu Vijeća ministara (u daljnjem tekstu: Poslovník).

### Član 17.

U ostvarivanju svojih prava i dužnosti Vijeće ministara donosi odluke, zaključke i rješenja, usvaja nacрте i prijedloge zakona, analize, informacije, strategijska dokumenta, programe, sporazume, protokole i druga akta (u daljnjem tekstu: akta).



## Član 18.

(1) Vijeće ministara donosi akta iz svoje nadležnosti većinom glasova članova koji su prisutni i glasaju o svim pitanjima i temama o kojima u daljnjoj proceduri konačno odlučuje Parlamentarna skupština Bosne i Hercegovine.

(2) O ostalim pitanjima Vijeće ministara u pravilu odlučuje konsensusom članova koji su prisutni i glasaju a osobito o propisima, imenovanjima i postavljenjima iz djelokruga Vijeća ministara, Poslovniku i njegovom tumačenju.

(3) U slučaju da se konsenzus ne postigne, predsjedavajući Vijeća ministara saziva člana, odnosno članove Vijeća ministara koji je (su) protiv kako bi se postiglo rješenje. U slučaju da konsenzus ne bude postignut u roku od sedam dana ni na taj način, **odluku donosi Vijeće ministara u skladu sa stavom (1) ovog člana, s tim da navedena većina podrazumijeva glas najmanje jednog člana iz svakog konstitutivnog naroda.**

**(4) U slučaju da zamjenik ministra zamjenjuje ministra u skladu s ovim zakonom, glas navedenog zamjenika ministra računa se za potrebe izračunavanja većine propisane u stavu (1) ovog člana i za potrebe utvrđivanja postojanja konsenzusa propisanog u stavu (2) ovog člana. Prilikom računanja većine propisane u stavu (3) ovog člana, uračunava se glas navedenog zamjenika ministra, ali se ne smatra glasom pripadnika bilo kojeg od konstitutivnih naroda.**

## Član 19.

Odluke Vijeća ministara su donesene danom usvajanja na sjednici, osim ako Vijeće ministara ne odluči drugačije i objavljuju se u “Službenom glasniku BiH”.

## Član 20.

Organi i druga tijela vlasti u Bosni i Hercegovini dužni su u potpunosti se pridržavati odluka Vijeća ministara Bosne i Hercegovine donesenih u skladu sa nadležnostima Vijeća ministara Bosne i Hercegovine.

## Član 21.

Vijeće ministara osigurava javnost svog rada.



## UREDI, SLUŽBE I RADNA TIJELA

### Član 22.

(1) Radi osiguranja potpunog, djelotvornog, kvalitetnog i usklađenog obavljanja poslova Vijeće ministara osniva stalne ili privremene urede, direkcije, službe, odbore i druga tijela.

(2) Stalna tijela su:

Direkcija za EU integracije, Generalni sekretarijat, Ured za zakonodavstvo, Odbor za unutrašnju politiku i Odbor za ekonomiju, *Direkcija za ekonomsko planiranje*, **Ured koordinatora Brčko distrikta Bosne i Hercegovine**.

### Direkcija za EU integracije

### Član 23.

(1) Direkcija za evropske integracije vrši naročito poslove koji se odnose na usklađivanje aktivnosti tijela vlasti u Bosni i Hercegovini, nadzor nad provedbom odluka koje donose nadležne institucije u Bosni i Hercegovini a koje se odnose na sve odgovarajuće aktivnosti potrebne za evropske integracije.

(2) Direkcija učestvuje u aktivnostima ili izrađuje nacрте i prijedloge politika, zakona, drugih propisa i smjernica koje se odnose na izvršenje poslova koje je Bosna i Hercegovina dužna poduzimati kako bi se uključila u procese evropske integracije.

(3) Direkcija obavlja i druge poslove koji se odnose na pokretanje inicijativa i savjetovanje o pitanjima usklađivanja ukupnih procesa i aktivnosti tijela vlasti u Bosni i Hercegovini na ispunjenju obaveza prema evropskim integracijama.

(4) Direkcija za evropske integracije vrši i druge poslove i zadatke koje joj dodijeli Vijeće ministara, odnosno predsjedavajući Vijeća ministara.

(5) Direkcijom rukovodi direktor kojeg imenuje i razrješava Vijeće ministara na prijedlog predsjedavajućeg Vijeća ministara, u skladu sa Zakonom o državnoj službi u institucijama Bosne i Hercegovine.

(6) Direktor je neposredno odgovoran za svoj rad predsjedavajućem Vijeća ministara.



## Generalni sekretarijat

### Član 24.

- (1) Generalni sekretarijat obavlja naročito poslove koji se odnose na: pripremu sjednica i sastanaka, vođenje zapisnika, vođenje evidencije, informiranje javnosti, praćenje provedbe odluka Vijeća ministara, protokol, obavlja materijalno-finansijske, administrativne i tehničke poslove za Vijeće ministara u izvršavanju njegovih zadataka, stara se o objavljivanju odluka Vijeća ministara u službenim glasilima te vrši i druge poslove koje mu odlukom dodijeli Vijeće ministara.
- (2) Unutrašnja organizacija Generalnog sekretarijata utvrđuje se pravilnikom koji donosi Vijeće ministara.
- (3) Radom Generalnog sekretarijata rukovodi generalni sekretar kojeg imenuje i razrješava Vijeće ministara na prijedlog predsjedavajućeg, u skladu sa Zakonom o državnoj službi u institucijama Bosne i Hercegovine.
- (4) Generalni sekretar je neposredno odgovoran za svoj rad predsjedavajućem Vijeća ministara.

## Ured za zakonodavstvo

### Član 25.

- (1) Ured za zakonodavstvo je mjerodavan za davanje pravnog mišljenja o materijalima koji se upućuju Vijeću ministara u pogledu njihovog metodološkog jedinstva u pripremi i u pogledu usuglašenosti sa Ustavom BiH i zakonima BiH, za brigu o objavljivanju odluka u službenom glasilu BiH, entiteta i Brčko distrikta BiH.
- (2) Uredom za zakonodavstvo rukovodi direktor.
- (3) Direktora Ureda imenuje i razrješava Vijeće ministara u skladu sa Zakonom o državnoj službi u institucijama Bosne i Hercegovine.



## Odbor za unutrašnju politiku

### Član 26.

- (1) Odbor za unutrašnju politiku je koordinirajuće tijelo za oblast iz djelokruga rada sljedećih ministarstava: Ministarstvo za ljudska prava i izbjeglice, Ministarstvo civilnih poslova, Ministarstvo pravde i Ministarstvo sigurnosti.
- (2) Sva pitanja iz nadležnosti ministarstava iz stava 1. ovog člana, prije rasprave na sjednici Vijeća ministara obavezno se prethodno raspravljaju na sjednici Odbora za unutrašnju politiku.
- (3) Odborom, u pravilu, predsjedava zamjenik predsjedavajućeg Vijeća ministara, a čine ga ministri ili zamjenici ministra iz stava 1. ovog člana, predstavnici Direkcije za EU integracije i Ureda za zakonodavstvo, **Ured koordinatora Brčko distrikta Bosne i Hercegovine** te drugi članovi u skladu sa odlukom Vijeća ministara.

## Odbor za ekonomiju

### Član 27.

- (1) Odbor za ekonomiju je koordinirajuće tijelo za oblasti iz djelokruga rada sljedećih ministarstava: Ministarstvo za vanjsku trgovinu i ekonomske odnose, Ministarstvo finansija i trezora i Ministarstvo komunikacija i prometa.
- (2) Sva pitanja iz nadležnosti ministarstava iz stava 1. ovog člana, prije rasprave na sjednici Vijeća ministara obavezno se prethodno raspravljaju na sjednici Odbora za ekonomiju.
- (3) Odborom, u pravilu, predsjedava zamjenik predsjedavajućeg Vijeća ministara, a čine ga ministri ili zamjenici ministra iz stava 1. ovog člana, predstavnici Direkcije za EU integracije i Ureda za zakonodavstvo, **Ured koordinatora Brčko distrikta Bosne i Hercegovine** te drugi članovi u skladu sa odlukom Vijeća ministara.

## Član 27a.

Direkcija za ekonomsko planiranje (u daljnjem tekstu: Direkcija) nadležna je za:

1. koordiniranje pripreme godišnjih, srednjoročnih i dugoročnih makroekonomskih projekcija,
2. koordiniranje pripreme godišnjih, srednjoročnih i dugoročnih strategija razvoja,
3. monitoring implementacije godišnjih, srednjoročnih i dugoročnih strategija razvoja,
4. istraživanja i analizu ekonomskih trendova,
5. istraživanja i analizu uključivanja svih slojeva društva u ekonomske tokove,
6. ostala istraživanja koja joj dodijeli Vijeće ministara BiH, odnosno vlade entiteta i Brčko distrikta BiH.

## Član 27b.

(1) Direkcija u ostvarivanju nadležnosti iz člana 27a. ovog zakona priprema i javno objavljuje sljedeće dokumente:

1. godišnje, srednjoročne i dugoročne makroekonomske projekcije,
2. polugodišnje i godišnje izvještaje o ekonomskim trendovima u BiH,
3. polugodišnje i godišnje izvještaje o implementaciji godišnjih, srednjoročnih i dugoročnih razvojnih strategija,
4. godišnje izvještaje o stanju uključenosti svih slojeva društva u ekonomske tokove u BiH.

(2) U izradi dokumenata iz stava 1. ovog člana Direkcija je obavezna saradivati sa svim relevantnim institucijama na svim nivoima vlasti u Bosni i Hercegovini.

(3) Direkcijom rukovodi direktor, kojeg imenuje i razrješava Vijeće ministara Bosne i Hercegovine, u skladu sa Zakonom o državnoj službi u institucijama Bosne i Hercegovine.



## Član 27.a

**(1) Ured koordinatora Brčko distrikta Bosne i Hercegovine (u daljnjem tekstu: Ured koordinatora) nadležan je da vrši sve aktivnosti s ciljem koordinacije rada Vijeća ministara i Brčko distrikta Bosne i Hercegovine, a u svrhu primjene konačne arbitražne odluke za Brčko.**

**(2) Ured koordinatora naročito će imati sljedeće nadležnosti, prava i dužnosti:**

- 1. da bude pravovremeno informiran o svim sjednicama Vijeća ministara;**
- 2. da prisustvuje svim sjednicama Vijeća ministara, Odbora za unutrašnju politiku i Odbora za ekonomiju;**
- 3. da, s ciljem realizacije poslova iz svoje nadležnosti, ima pristup svim materijalima, koji se pripremaju za sjednicu Vijeća ministara, materijalima koje Vijeće ministara prosljeđuje Parlamentarnoj skupštini Bosne i Hercegovine, kao i materijalima prosljeđenim Vijeću ministara od Parlamentarne skupštine Bosne i Hercegovine;**
- 4. da, po ovlaštenju predsjedavajućeg Vijeća ministara i predsjedavajućih Odbora za unutrašnju politiku i Odbora za ekonomiju, učestvuju u raspravi na sjednicama Vijeća ministara i oba odbora o svim tačkama dnevnog reda koje se odnose na Brčko distrikt Bosne i Hercegovine, bez prava učešća u donošenju odluka;**
- 5. da posredstvom predsjedavajućeg Vijeća ministara predlaže tačke dnevnog reda iz svoje nadležnosti za sjednice Vijeća ministara.**

## Član 27.b

**Koordinator i osoblje Ureda koordinatora su javni službenici Brčko distrikta Bosne i Hercegovine, u skladu sa zakonom Brčko distrikta Bosne i Hercegovine kojim se uređuje status javnih službenika.**





## PRAVA I DUŽNOSTI PREDSEDAVAJUĆEG I ČLANOVA VIJEĆA MINISTARA

### Član 28.

Predsjedavajući predstavlja Vijeće ministara i odgovoran je:

1. za usklađivanje rada Vijeća ministara;
2. za usklađivanje ustavnih odnosa Vijeća ministara s radom Predsjedništva BiH, Parlamentarne skupštine BiH, kao i s entitetima i Brčko distriktom BiH;
3. za osiguravanje saradnje između Vijeća ministara i vlada entiteta i nižih nivoa vlasti;
4. za sazivanje sjednica Vijeća ministara;
5. za predsjedanje sjednicama Vijeća ministara;
6. za dnevni red sjednica Vijeća ministara;
7. za provedbu odluka Vijeća ministara;
8. za rad Direkcije za EU integracije.

### Član 29.

Predsjedavajući Vijeća ministara, u saradnji sa svojim zamjenicima, utvrđuje politiku rada Vijeća ministara, a posebno prioritete i dinamiku u radu Vijeća ministara.

### Član 30.

- (1) Predsjedavajući Vijeća ministara posebno usklađuje i prati aktivnosti institucija vlasti u Bosni i Hercegovini vezane za integriranje Bosne i Hercegovine u EU.
- (2) U cilju djelotvornog obavljanja ovih poslova i zadataka predsjedavajućem Vijeća ministara je izravno odgovorna Direkcija za EU integracije.



## Član 31.

Predsjedavajući Vijeća ministara za svoj rad odgovara Parlamentarnoj skupštini BiH i Predsjedništvu BiH.

## Član 32.

**Predsjedavajućeg Vijeća ministara, u slučaju njegove odsutnosti ili druge vrste spriječenosti da obavlja svoje dužnosti, zamjenjuje najmlađi od zamjenika predsjedavajućeg Vijeća ministara. U tom slučaju, navedeni zamjenik predsjedavajućeg ima sva prava i dužnosti predsjedavajućeg Vijeća ministara.**

## Član 33.

Članovi Vijeća ministara osim prava i dužnosti neposrednog rukovođenja radom ministarstva i odgovornosti za stanje u oblastima iz djelokruga rada ministarstva, mogu pokretati inicijativu i razmatrati pitanja i utvrđivati stajališta po pojedinim pitanjima i koja nisu iz djelokruga ministarstva kojim rukovode, s tim da ta pitanja spadaju u ustavnu nadležnost Vijeća ministara.

## ODNOSI VIJEĆA MINISTARA I DRUGIH TIJELA U BiH

### Odnosi s Parlamentarnom skupštinom Bosne i Hercegovine

## Član 34.

- (1) Vijeće ministara odgovara za svoj rad Parlamentarnoj skupštini.
- (2) Vijeće ministara najmanje jednom godišnje podnosi izvještaj Parlamentarnoj skupštini, uključujući i izvještaj o budžetu.
- (3) Parlamentarna skupština može zatražiti da joj Vijeće ministara podnese i vanredni izvještaj o određenom pitanju.



## Član 35.

- (1) Vijeće ministara Parlamentarnoj skupštini predlaže zakone i druge akte u okviru svoga djelokruga.
- (2) Na zahtjev Parlamentarne skupštine Vijeće ministara pripremit će prijedloge zakona, drugih akata i potrebnih materijala.

## Član 36.

- (1) Vijeće ministara može predložiti sazivanje sjednice bilo kojeg doma ili radne komisije domova Parlamentarne skupštine, koje će na takav prijedlog postupati u skladu sa poslovníkom odgovarajućeg Doma.
- (2) Članovi Vijeća ministara imaju pravo i dužnost sudjelovati na sjednicama domova i radnih komisija Parlamentarne skupštine BiH.

## Član 37.

Na pitanja članova Parlamentarne skupštine postavljena Vijeću ministara, Vijeće ministara daje odgovore, u skladu sa poslovnícima domova Parlamentarne skupštine i svojim poslovníkom.

## Član 38.

Odnosi između Vijeća ministara i Parlamentarne skupštine bit će detaljno regulisani poslovnícima domova Parlamentarne skupštine i Poslovníkom o radu Vijeća ministara.

## **Odnosi s drugim tijelima**

## Član 39.

Vijeće ministara redovno informira Predsjedništvo BiH o odlukama i drugim aktivnostima Vijeća ministara.



#### Član 40.

Vijeće ministara može predložiti tačke za dnevni red Predsjedništva i Predsjedništvo može predložiti tačke za dnevni red Vijeća ministara.

#### Član 41.

Predsjedništvo može predložiti sazivanje sjednice Vijeća ministara na kojoj bi se raspravljalo o pitanju od posebne važnosti za Predsjedništvo.

#### Član 42.

Vijeće ministara saraduje u okviru svoje nadležnosti sa izvršnim i zakonodavnim tijelima Federacije Bosne i Hercegovine, Republike Srpske i Brčko distrikta Bosne i Hercegovine.

### **PRIJELAZNE I ZAVRŠNE ODREDBE**

#### Član 43.

Sredstva za rad Vijeća ministara, Direkcije za EU integracije, Generalnog sekretarijata, Ureda za zakonodavstvo i drugih stalnih i privremenih tijela koje osniva Vijeće ministara osiguravaju se u budžetu Bosne i Hercegovine.



#### Član 43a.

(1) Do izbora 2010. godine, za sva imenovanja i potvrde imenovanja na dužnosti iz čl. 9. i 10. ovog zakona, koji se izvrše u tom periodu, svako lice dužno je, osim informacija iz čl. 10d. i 10f. ovog zakona, navesti i to da li je ikada bilo smijenjeno odlukom Visokog predstavnika, donesenom saglasno Aneksu 10. Općeg okvirnog sporazuma za mir u Bosni i Hercegovini ili se na njega odnosila odluka za opstrukcije ili aktivnosti u suprotnosti s Općim okvirnim sporazumom za mir u Bosni i Hercegovini koju je donio IPTF na osnovu Aneksa 11. Općeg okvirnog sporazuma za mir u Bosni i Hercegovini ili se na njega odnosila odluka za opstrukcije ili aktivnosti u suprotnosti s Općim okvirnim sporazumom za mir u Bosni i Hercegovini donesena prema odredbama Glave 14. Uputstva stranama izdatim prema Aneksu 1.A. Općeg okvirnog sporazuma za mir u Bosni i Hercegovini, bez obzira na to da li su pravne posljedice te odluke kasnije prestale, ograničene ili na drugi način promijenjene.

(2) U periodu iz stava 1. ovog člana Predsjedništvo BiH i predsjedavajući Vijeća ministara, osim informacija iz člana 10f. ovog zakona, dostavljaju Komisiji i informaciju iz stava 1. ovog člana.

(3) U period iz stava 1. ovog člana uključeni su i izbori 2010. godine.

#### Član 44.

U roku od trideset (30) dana od stupanja na snagu ovog zakona Vijeće ministara će donijeti odluku o načinu nastavka rada Vijeća ministara, kojom će se po potrebi urediti izmjene, odnosno raspuštanje postojećih administrativnih tijela koja obavljaju funkcije koje su u nadležnosti Bosne i Hercegovine.

#### Član 45.

U roku od trideset (30) dana od stupanja na snagu ovog zakona, Vijeće ministara će:

1. usvojiti Poslovnik o radu Vijeća ministara kojim će potpunije urediti pripreme i način održavanja i vođenja sjednica Vijeća ministara;
2. imenovati direktora Direkcije za EU integracije;
3. imenovati generalnog sekretara Vijeća ministara i
4. imenovati direktora Ureda za zakonodavstvo.



## Član 46.

U roku od četrdeset i pet (45) dana od dana stupanja na snagu ovog zakona, Vijeće ministara će usvojiti Pravilnik o unutrašnjoj organizaciji stalnih tijela Vijeća ministara (Direkcije za EU integracije, Generalnog sekretarijata, Ureda za zakonodavstvo, Odbora za unutrašnju politiku i Odbora za ekonomiju).

## Član 46a.

**U roku od godinu dana od dana stupanja na snagu ovog zakona, donijet će se zakon kojim će se regulirati organizacija Vijeća ministara, na način da se osigura jednaka zastupljenost konstitutivnih naroda Bosne i Hercegovine, saglasno članovima V. 4. (b) i IX. 3. Ustava Bosne i Hercegovine.**

## Član 47.

Ovaj zakon se objavljuje u “Službenom glasniku BiH” odmah, a stupa na snagu 3. decembra 2002. godine.

## Član 48.

Danom stupanja na snagu ovog zakona prestaje da važi Zakon o Vijeću ministara i ministarstvima Bosne i Hercegovine, objavljen u “Službenom glasniku BiH”, broj 11/00, 17. aprila 2000. godine.

\*

**“Službeni glasnik BiH”, broj 42/03**



#### Član 4.

Ovaj zakon stupa na snagu osmog dana od dana objavljivanja u “Službenom glasniku BiH”, a objavit će se i u službenim glasilima entiteta i Brčko distrikta Bosne i Hercegovine.

\*\*

“Službeni glasnik BiH”, broj 81/06

#### Član 6.

Ovaj zakon stupa na snagu osmog dana od dana objavljivanja u “Službenom glasniku BiH”.

\*\*\*

*“Službeni glasnik BiH”, broj 81/06*

#### Član 3.

*Ovaj zakon stupa na snagu osmog dana od dana objavljivanja u “Službenom glasniku BiH”.*

\*\*\*\*

*“Službeni glasnik BiH”, broj 76/07*

#### Član 5.

*Ovaj zakon stupa na snagu osmog dana od dana objavljivanja u “Službenom glasniku BiH”, a objavit će se u službenim glasilima entiteta i Brčko distrikta Bosne i Hercegovine.*

\*\*\*\*\*

“Službeni glasnik BiH”, broj 81/07



## Član 7.

**Ovaj zakon stupa na snagu danom objavljivanja u “Službenom glasniku BiH”.**

\*\*\*\*\*

*“Službeni glasnik BiH”, broj 24/08*

## Član 2.

*Ovaj zakon stupa na snagu osmog dana od dana objavljivanja u “Službenom glasniku BiH”.*









## **Odluka o donošenju Autentičnog tumačenja Zakona o izmjenama i dopunama Zakona o Vijeću ministara Bosne i Hercegovine donesenog Odlukom visokog predstavnika od 19. oktobra 2007. godine**

**Koristeći se** ovlaštenjima koja su visokom predstavniku dana članom V Aneksa 10 (Sporazum o civilnoj implementaciji Mirovnog ugovora) Općeg okvirnog sporazuma za mir u Bosni i Hercegovini, prema kojem je visoki predstavnik konačni autoritet za tumačenje navedenog Sporazuma o civilnoj implementaciji Mirovnog ugovora, i članom II 1. (d) prethodno navedenog Sporazuma, koji od visokog predstavnika zahtijeva da olakša rješavanje bilo kojih poteškoća koje se pojave u vezi sa civilnom implementacijom Općeg okvirnog sporazuma za mir u Bosni i Hercegovini;

**Pozivajući sena** stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru visokog predstavnika da iskoristi svoj konačni autoritet za tumačenje Sporazuma o civilnoj implementaciji Mirovnog ugovora, kako bi olakšao rješavanje bilo kojih poteškoća kao što je gore rečeno „donošenjem obavezujućih odluka kakogod on ocijeni da je neophodno” o određenim pitanjima, uključujući i (prema tački (c) stava XI.2) „mjere kojima se osigurava implementacija Mirovnog sporazuma na cijeloj teritoriji Bosne i Hercegovine i njenih entiteta, kao i neometano funkcioniranje zajedničkih institucija”;

**Pozivajući se takođe** na Odluku visokog predstavnika, od 19. oktobra 2007. godine, o donošenju Zakona o izmjenama i dopunama Zakona o Vijeću ministara Bosne i Hercegovine;

**Imajući u vidu** da prema članu 137-140. Poslovnika Predstavničkog doma Parlamentarne skupštine Bosne i Hercegovine i članu 131-134. Poslovnika Doma naroda Parlamentarne skupštine Bosne i Hercegovine spomenuti domovi mogu donijeti autentična tumačenja zakona;

**Konstatujući** da se upravljanje institucijama Bosne i Hercegovine mora rukovoditi duhom kompromisa između svih konstitutivnih naroda Bosne i Hercegovine i između predstavnika imenovanih iz različitih entiteta Bosne i Hercegovine;

**Konstatujući takođe** da je Odluka od 19. oktobra u tom duhu donesena i da bi je shodno tome trebalo tumačiti odnosno provoditi;

Uzevši u obzir, konstatujući, te imajući u vidu sve prethodno navedeno, visoki predstavnik donosi sljedeću:



## ODLUKU

### **o donošenju Autentičnog tumačenja Zakona o izmjenama i dopunama Zakona o Vijeću ministara Bosne i Hercegovine donesenog Odlukom visokog predstavnika od 19. oktobra 2007. godine**

Ovo Autentično tumačenje postaje sastavnim dijelom Zakona o izmjenama i dopunama Zakona o Vijeću ministara Bosne i Hercegovine donesenog Odlukom visokog predstavnika od 19. oktobra 2007. godine (“Službeni glasnik Bosne i Hercegovine”, br. 81/07) i ima zakonsku snagu.

Ovo Autentično tumačenje se odmah objavljuje u “Službenom glasniku Bosne i Hercegovine” i stupa na snagu danom objavljivanja.

Ovo Autentično tumačenje će se smatrati važećim od dana stupanja na snagu Zakona o izmjenama i dopunama Zakona o Vijeću ministara Bosne i Hercegovine donesenog Odlukom visokog predstavnika od 19. oktobra 2007. godine na privremenoj osnovi, sve dok Parlamentarna skupština Bosne i Hercegovine ne usvoji ovo Autentično tumačenje skupa sa spomenutim Zakonom u istom obliku, bez izmjena i dopuna i bez dodatnih uvjeta.

Ova Odluka se objavljuje na službenoj Internet stranici Kancelarije visokog predstavnika i stupa na snagu odmah.

Ova Odluka se odmah objavljuje u “Službenom glasniku Bosne i Hercegovine”.

*Sarajevo, 3. decembra 2007.*

*Miroslav Lajčák*  
*Visoki predstavnik*



## Autentično tumačenje

### **Zakona o izmjenama i dopunama Zakona o Vijeću ministara Bosne i Hercegovine donesenog Odlukom visokog predstavnika od 19. oktobra 2007. godine**

1. Cilj Zakona o izmjenama i dopunama Zakona o Vijeću ministara Bosne i Hercegovine donesenog Odlukom visokog predstavnika od 19. oktobra 2007. godine (u daljem tekstu: "Zakon") jeste da se omogući neometan rad Vijeća ministara (u daljem tekstu: VM).
2. Ove izmjene i dopune se bez razlike podjednako primjenjuju na sve članove VM-a.
3. Izmjenama i dopunama se ne zadire u sveukupni sastav VM-a, i to konkretno u jednaku zastupljenost konstitutivnih naroda Bosne i Hercegovine (vidi čl. 6. Zakona o Vijeću ministara Bosne i Hercegovine, "Službeni glasnik Bosne i Hercegovine", br.38/02, 30/03, 42/03, 81/06 i 76/07; i čl. IX.3 Ustava).
4. Izmjenama i dopunama se osigurava da nijedan od članova VM-a ne može opstuirati njegov rad time što jednostavno neopravdano i nedopušteno izostaje sa sjednica, kao i potreba da Vijeću ministara bude omogućeno da stalno donosi odluke.
5. Izmjene i dopune nisu na štetu bilo kojeg konstitutivnog naroda i bilo kojeg od entiteta Bosne i Hercegovine. One će se provoditi u dobroj namjeri.
6. Izmjenama i dopunama se konkretno obrađuju sljedeća pitanja:

#### **a) Zamjena predsjedavajućeg Vijeća ministara zamjenikom predsjedavajućeg i zamjena ministra njegovim zamjenikom.**

##### *i) Zamjena predsjedavajućeg Vijeća ministara*

7. Kada se govori o zamjeni predsjedavajućeg Vijeća ministara, član 32. Zakona o Vijeću ministara propisuje:

„Predsjedavajućeg Vijeća ministara, u slučaju njegove odsutnosti ili druge vrste spriječenosti da obavlja svoje dužnosti, zamjenjuje najmlađi od zamjenika predsjedavajućeg Vijeća ministara. U tom slučaju, navedeni zamjenik predsjedavajućeg ima sva prava i dužnosti predsjedavajućeg Vijeća ministara.”

8. Da bi izbjegli svaku vrstu sumnje, mehanizam zamjene propisan u članu 32. Zakona o Vijeću ministara primjenjuje se jedino u slučajevima odsustva ili spriječenosti da se obavljaju dužnosti koje su **privremenog** karaktera i neće se tumačiti na bilo koji način, bilo posredno ili neposredno, tako da dozvoljava zamjeniku predsjedavajućeg Vijeća ministara da zamjeni predsjedavajućeg Vijeća ministara u slučajevima trajne spriječenosti da obavlja svoje dužnosti. Član 32 se mora tumačiti u vezi sa članom 12.(3) Zakona o Vijeću ministara koji izričito regulira slučajeve **trajne** spriječenosti predsjedavajućeg Vijeća ministara da obavlja svoje dužnosti.



9. Članom 12.(3) propisuje se da ako je predsjedavajući Vijeća ministara **trajno** spriječen da vrši svoje dužnosti, Vijeće ministara daje ostavku u cjelini i novi postupak imenovanja i odobravanja svih članova Vijeća ministara, uključujući i predsjedavajućeg, mora biti sproveden u skladu s relevantnim odredbama Zakona o Vijeću ministara. Članom 12. (3) predviđa se sljedeće:

“Ako predsjedavajući Vijeća ministara podnese ostavku ili ako je **trajno** spriječen da vrši svoju dužnost, Vijeće ministara daje ostavku u cjelini a dužnost obavlja do potvrde novog predsjedavajućeg i članova Vijeća ministara. U tom slučaju primjenjuje se postupak iz člana 9. i 10. ovog zakona.” (zatamnjeni dio naglašen)

10. Način na koji se utvrđuje privremena spriječenost ili odsustvo jeste materija koja se uređuje Poslovníkom o radu Vijeća ministara. Pored toga, i da bi izbjegli svaku sumnju, članom 32. ne omogućava se zamjeniku predsjedavajućeg koji vrši dužnost predsjedavajućeg Vijeća ministara da bude izuzet od uvjeta kojim se ograničavaju nadležnosti zamjenika predsjedavajućeg u pogledu sazivanja sjednica Vijeća ministara. Naprimjer, zamjenik predsjedavajućeg koji zamjenjuje predsjedavajućeg Vijeća ministara u smislu člana 32. može sazvati sjednicu jedino zajedno s drugim zamjenikom predsjedavajućeg i to u slučaju kada je predsjedavajući propustio, suprotno odredbama ovog Zakona i odredbama navedenog Poslovníka, da sazove dvije uzastopne sjednice Vijeća ministara.

#### *ii) Zamjena ministra*

11. Zakonom su izmijenjeni i dopunjeni članovi 14. i 15. Zakona o Vijeću ministara s ciljem da se osigura da, u periodu između dana podnošenja ostavke, smjene ili trajne spriječenosti ministra i dana kada nasljednik ministra preuzme dužnost, zamjenik ministra privremeno obavlja dužnosti datog ministra. Takva mogućnost vršenja dužnosti u ime odsutnog ministra je već postojala u Zakonu o Vijeću ministara proglašenom u decembru 2002. godine, ali je bila ograničenog djelokruga. Izuzetak koji se uvodi ovim izmjenama i dopunama takođe ograničava nadležnosti u pogledu donošenja odluka zamjenika ministra.

12. Što se tiče utjecaja zamjene od strane zamjenika ministra na odlučivanje u Vijeću ministara, prethodno pomenute izmjene i dopune potrebno je tumačiti u vezi s izmjenama i dopunama koje su Zakonom unesene u član 18. Zakona o Vijeću ministara. Zakonom je dodan novi stav (4) u članu 18. i time je osigurano, između ostalog, da se glas zamjenika ministra ne može računati kao glas pripadnika bilo kojeg od konstitutivnih naroda. Novim stavom (4) izričito se predviđa:

“(4) U slučaju da zamjenik ministra zamjenjuje ministra u skladu s ovim zakonom, glas navedenog zamjenika ministra računa se za potrebe izračunavanja većine propisane u stavu (1) ovog člana i za potrebe utvrđivanja postojanja konsenzusa propisanog u stavu





Članom 16. stav (2) koji je proglašen Zakonom, izričito se predviđa sljedeće:

“Po pravilu, sjednice Vijeća ministara održavaju se najmanje jednom sedmično, **osim u opravdanim slučajevima utvrđenim u Poslovniku o radu Vijeća ministara Bosne i Hercegovine**. Ako **suprotno odredbama ovog zakona i odredbama navedenog Poslovnika** predsjedavajući Vijeća ministara ne sazove **dvije uzastopne sjednice** Vijeća ministara, sjednicu će zajednički sazvati zamjenici predsjedavajućeg.” (zatamnjeni dio naglašen)

17. Na Vijeću ministara će biti da u svom Poslovniku o radu definira takve *opravdane slučajeve*, tj. okolnosti u kojima se opravdava neodržavanje sjednice Vijeća ministara (npr. praznik kojeg proslavljaju određeni članovi Vijeća ministara).

18. Po pravilu, u takve opravdane slučajeve će, između ostalog, spadati:

(1) Odsutnost svih članova (ministri i predsjedavajući Vijeća ministara ako se dati slučaj pojavi) koji predstavljaju dati konstitutivni narod; i

(2) Odsutnost svih članova imenovanih sa teritorije datog entiteta.

U tu svrhu, biće uspostavljen mehanizam prema kojem će osoba odnosno osobe koje sazivaju sjednicu i osoba koja predsjedava sjednicom uložiti maksimalne napore kako bi osigurali da najmanje jedan takav član iz svakog konstitutivnog naroda i najmanje jedan član imenovan s teritorije svakog entiteta bude prisutan na sjednici. Ukoliko ovi napori ne uspiju, osoba odnosno osobe koje sazivaju sjednicu ili osoba koja predsjedava sjednicom će odgoditi održavanje sjednice za minimalno tri (3) dana i maksimalno sedam (7) dana.

Neprisustvovanjem na ponovo sazvanoj sjednici članova koji predstavljaju isti konstitutivni narod i/ili imenovanih s teritorije istog entiteta, neće se spriječiti održavanje sjednice ukoliko postoji kvorum iz člana 16(3) ovog Zakona i nijedan drugi važeći opravdan slučaj ne sprječava njeno održavanje. Radi ilustracije, ako nijedan član iz reda konstitutivnog naroda A ne može biti prisutan kada je sjednica sazvana, osoba ili osobe koje sazivaju sjednicu ili osoba koja predsjedava tom sjednicom će odgoditi njeno održavanje. Kada je sjednica ponovo sazvana, odsustvovanje svih članova iz reda istog konstitutivnog naroda neće predstavljati opravdan slučaj za neodržavanje sjednice. Pored toga, uz pretpostavku da su članovi koji predstavljaju konstitutivni narod A imenovani sa teritorije entiteta X, odsustvovanje svih članova imenovanih sa teritorije entiteta X kada je sjednica ponovo sazvana, neće predstavljati opravdan slučaj za neodržavanje sjednice.

#### **d) Donošenje odluka Vijeća ministara:**

19. Odlukom se pravi razlika između: (1) odluka koje donosi Vijeće ministara o pitanjima o kojima konačnu odluku donosi Parlamentarna skupština (npr. zakoni) i (2) konačnih odluka Vijeća ministara (imenovanja, podzakonski akti, itd.)





– O pitanjima o kojima konačnu odluku donosi Parlamentarna skupština: izmjenama donesenim Zakonom ne mijenja se uvjet većinskog odlučivanja sadržan u članu 18. (1) Zakona o Vijeću ministara. Međutim, Zakonom se predviđa da će ta većina biti izračunata na osnovu članova koji su prisutni i glasaju. Ova odredba mora se tumačiti u skladu s članom 16(1) Zakona o Vijeću ministara, u kojem se izričito predviđa da članovi VM-a imaju obavezu da učestvuju u radu Vijeća ministara. Izmjene donesene ovim Zakonom u cijelosti su u skladu s ovom obavezom i osiguravaju da se rad VM-a ne može blokirati pukim izostajanjem. Ranije pravilo, prema kojem je bila potrebna većina od ukupnog broja članova za donošenje odluka o kojima konačno odlučuje Parlamentarna skupština u praksi se svodilo na to da se smatra da su odsutni ministri glasali “protiv” odluka koje razmatra Vijeće ministara. Odredba se primjenjuje podjednako na sve članove Vijeća ministara bez razlike. Neophodno je prisjetiti se na kraju da se ove odluke proslijeđuju Parlamentarnoj skupštini gdje se primjenjuje postupak odlučivanja propisan Ustavom u članu IV.

– O svim ostalim pitanjima, uključujući i konačne odluke VM-a: izmjene donesene ovim Zakonom ne mijenjaju uvjet konsenzusa za donošenje odluka predviđen u čl. 18.(2) Zakona o Vijeću ministara. Radi jasnoće, izmjenama se predviđa da će se konsenzus računati na osnovu članova koji su prisutni i glasaju. Ova odredba, upravo kao i izmjena u članu 18 (1), mora se tumačiti u vezi s članom 16 (1) Zakona o Vijeću ministara, u kojem se izričito predviđa da članovi Vijeća ministara imaju obavezu da učestvuju u radu Vijeća ministara. Izmjene donesene Zakonom u cijelosti su u skladu s ovom obavezom i osiguravaju da rad Vijeća ministara ne može biti blokiran pukim izostajanjem. Odredba se primjenjuje podjednako na sve članove Vijeća ministara bez razlike.

Izmjene i dopune donesene Zakonom u članu 18(3) Zakona o Vijeću ministara osiguravaju bolje funkcioniranje Vijeća ministara time što iziskuju da, ako konsenzus nije postignut, propisana većina će uključivati glas najmanje jednog (1) člana iz svakog konstitutivnog naroda. Ova odredba primjenjuje se podjednako na sve članove Vijeća ministara bez razlike. Neophodno je naglasiti da se ovo pravilo odnosi na konstitutivne narode a ne na entitete. U tom pogledu, upućuje se da se prethodna odredba isto tako nije odnosila ni na entitetsku zastupljenost. Kao takvo ovo pravilo ne spada u predmet člana V(4)b Ustava BiH, kojim se predviđa da “Najviše dvije trećine svih ministara mogu biti **imenovani** sa teritorije Federacije.” [zatamnjeni dio naglašen]. Ovakva ustavna odredba se dakle primjenjuje na imenovanja i ne predstavlja pravilo o kvorumu ili donošenju odluka u Vijeću ministara.

Vrijedi ponoviti da uvjet da konačna odluka Vijeća ministara treba dobiti podršku jednog ministra iz svakog konstitutivnog naroda nije ugrožen odsutnošću jednog ili dvojice ostalih ministara navedenog konstitutivnog naroda.



Neophodno je isto tako prisjetiti se da postupak imenovanja i odobravanja članova Vijeća ministara propisan Ustavom osigurava da Predsjedništvo imenuje predsjedavajućeg Vijeća ministara i da sve članove Vijeća ministara mora odobriti Parlamentarna skupština. Entitetski interesi u pogledu sastava Vijeća ministara mogu se rješavati putem procedure vitalnog interesa entiteta, propisane u članu V (2) d) Ustava i putem procedure odlučivanja Parlamentarne skupštine, propisane u članu IV (3) d) Ustava.

Član 18. stav 3. mora se tumačiti u vezi sa članom 6. Zakona. Članom 6. stav 1. Zakona predviđa se sljedeće:

“Ukupni sastav Vijeća ministara će u toku cijelog mandata biti u potpunosti u skladu sa Ustavom Bosne i Hercegovine, naročito njegovim članovima V.4.(b) i IX.3., te će se u skladu s tim u sastavu Vijeća ministara osigurati jednaka zastupljenost konstitutivnih naroda Bosne i Hercegovine.”

U smislu člana 18. stav 3., glas člana Vijeća ministara ne može se ubrajati kao glas datog konstitutivnog naroda, ukoliko navedeni član nije imenovan u Vijeće ministara kao predstavnik istog konstitutivnog naroda. Svako drugo tumačenje bi dovelo do situacije u kojoj bi zaštita data konstitutivnim narodima u procesu donošenja odluka prema članu 18. stav 3. kao i garancija jednake zastupljenosti konstitutivnih naroda predviđena u članu 6. stav 1. postale nedjelotvorne.

S obzirom na stav 2. u članu 6. Zakona, kojim se propisuje da su predsjedavajući Vijeća ministara i zamjenici predsjedavajućeg iz različitih konstitutivnih naroda, član 18. stav 3. Zakona o Vijeću ministara će se tumačiti na način da se njime predviđa ulaganje najvećih napora kako bi se osiguralo da glas najmanje jednog člana iz svakog konstitutivnog naroda iz navedene odredbe daje predsjedavajući Vijeća ministara i zamjenici predsjedavajućeg Vijeća ministara. U slučaju da su predsjedavajući ili zamjenici predsjedavajućeg odsutni ili na drugi način spriječeni da na navedeni način glasaju, oni će ovlastiti po jednog člana Vijeća ministara koji pripada istom konstitutivnom narodu da daju glas u njihovo ime. U slučaju da predsjedavajući ili zamjenici predsjedavajućeg u tu svrhu ne ovlaste člana Vijeća ministara ili u slučaju da je u tu svrhu ovlašteni član Vijeća ministara odsutan ili na drugi način spriječen da da navedeni glas, bilo koji drugi član Vijeća ministara koji pripada datom konstitutivnom narodu ima pravo dati navedeni glas.







## **VIJEĆE MINISTARA BOSNE I HERCEGOVINE**

Na osnovu člana 17. i člana 45. stava 1. tačke 1. Zakona o Vijeću ministara Bosne i Hercegovine ("Službeni glasnik BiH", broj 38/02), Vijeće ministara Bosne i Hercegovine, na 7. sjednici održanoj 3. jula 2003. godine, usvojilo je

### **POSLOVNIK O RADU VIJEĆA MINISTARA BOSNE I HERCEGOVINE**

#### **I OSNOVNE ODREDBE**

##### **Član 1.**

##### **Obim Poslovnika**

Ovim poslovníkom, u skladu s odredbama Ustava Bosne i Hercegovine i Zakona o Vijeću ministara Bosne i Hercegovine (u daljnjem tekstu: Zakon o Vijeću), uređuju se: unutrašnja organizacija Vijeća ministara Bosne i Hercegovine (u daljnjem tekstu: Vijeće ministara), uređi, službe i radna tijela Vijeća ministara; programiranje rada Vijeća ministara; sjednice Vijeća ministara; akti Vijeća ministara; odnosi Vijeća ministara prema Parlamentarnoj skupštini Bosne i Hercegovine (u daljnjem tekstu: Parlament), Predsjedništvu Bosne i Hercegovine (u daljnjem tekstu: Predsjedništvo), Domu za ljudska prava Bosne i Hercegovine i Uredu ombudsmena Bosne i Hercegovine; saradnja sa izvršnim i zakonodavnim organima Federacije Bosne i Hercegovine, Republike Srpske i Brčko distrikta Bosne i Hercegovine, ministarstvima i drugim institucijama i organima Bosne i Hercegovine (u daljnjem tekstu: druge institucije i organi BiH), vladama drugih država i međunarodnim organima i organizacijama, kao i druga pitanja od značaja za rad Vijeća ministara.

##### **Član 2.**

##### **Sjedište i pečat Vijeća ministara**

1. Sjedište Vijeća ministara je u Sarajevu, u zgradi institucija Bosne i Hercegovine, Trg Bosne i Hercegovine broj 1.
2. Vijeće ministara ima pečat, čiji je oblik, sadržaj i način korištenja utvrđen Zakonom o pečatu institucija Bosne i Hercegovine.



### Član 3.

#### Dopuna Poslovnika

Ako neko pitanje u vezi s radom Vijeća ministara nije uređeno ovim poslovníkom, uredit će se zaključkom Vijeća ministara.

### Član 4.

#### Imunitet

1. Predsjedavajući Vijeća ministara (u daljnjem tekstu: predsjedavajući) i ministri imaju pravo na imunitet u skladu sa Zakonom o imunitetu Bosne i Hercegovine.
2. Licima iz prethodnog stava izdaje se legitimacija, čiji oblik uređuje Vijeće ministara svojom odlukom.

## II ORGANIZACIJA VIJEĆA MINISTARA

### Član 5.

#### Vijeće ministara

Vijeće ministara čine predsjedavajući i ministri Vijeća ministara utvrđeni u članu 5. Zakona o Vijeću.

### Član 6.

#### Predsjedavajući

1. Predsjedavajući, u skladu sa Zakonom o Vijeću, predstavlja Vijeće ministara i odgovoran je za:
  - a) usklađivanje rada Vijeća ministara;
  - b) usklađivanje ustavnih odnosa Vijeća ministara s radom Predsjedništva, Parlamenta, kao i sa entitetima i Brčko distriktom BiH;
  - c) osiguranje saradnje između Vijeća ministara i vlada entiteta i nižih nivoa vlasti;



- d) sazivanje sjednica Vijeća ministara;
- e) predsjedavanje sjednicama Vijeća ministara;
- f) dnevni red sjednica Vijeća ministara;
- g) provođenje odluka Vijeća ministara;
- h) rad Direkcije za evropske integracije.

Način izvršavanja ovih nadležnosti regulisan je ovim poslovníkom i posebnim odlukama Vijeća ministara.

2. Predsjedavajući u saradnji sa svojim zamjenicima utvrđuje politiku rada Vijeća ministara, a naročito prioritete i dinamiku u radu Vijeća ministara.

3. Predsjedavajući usklađuje i prati aktivnosti institucija vlasti u BiH vezane za integraciju Bosne i Hercegovine u evropske integracije, te u cilju djelotvornog obavljanja ovih poslova i zadataka predsjedavajućem je direktno odgovorna Direkcija za evropske integracije.

4. Predsjedavajući potpisuje odluke i druge akte koje donosi Vijeće ministara, kao i prijedloge, mišljenja, izjašnjenja i inicijative koje utvrđuje Vijeće ministara i dostavlja Parlamentu i Predsjedništvu u skladu s odlukama Vijeća ministara.

## Član 7.

### Zamjenici predsjedavajućeg

1. Predsjedavajući imenuje dva ministra za zamjenike predsjedavajućeg, koji ne mogu biti iz reda naroda iz kojeg je predsjedavajući.
2. Zamjenici predsjedavajućeg obavezni su da doprinose efikasnijem i kvalitetnom radu funkcija Vijeća ministara utvrđenih Ustavom i zakonima Bosne i Hercegovine.
3. Zamjenici predsjedavajućeg zamjenjuju predsjedavajućeg u slučaju njegove odsutnosti ili spriječenosti po redu koji odredi predsjedavajući i u tom slučaju imaju sva prava i dužnosti predsjedavajućeg.



## Član 8.

### Ministri

1. Ministri u skladu sa Zakonom o Vijeću obavezni su da učestvuju u radu Vijeća ministara i u radu radnih tijela i komisija u skladu s odlukom Vijeća ministara, te da izvršavaju druge im povjerene zadatke. Ministri su odgovorni za podržavanje i provođenje odluka i mišljenja Vijeća ministara.
2. Ministri imaju pravo i dužnost da prate pripreme određenih materijala, da budu upoznati s mogućim rješenjima i alternativama, da predlažu razmatranje pojedinih pitanja iz nadležnosti Vijeća ministara, da daju inicijativu za pripremanje zakona, drugih propisa i normativnih akata koje predlaže Vijeće ministara i propisa i drugih normativnih akata koje donosi Vijeće ministara.
3. Ministri određeni da učestvuju u radu drugog organa ili tijela, uz ovlaštenje predsjedavajućeg, obavezni su postupati u skladu s nadležnostima, uputstvima i mišljenjima Vijeća ministara.

## Član 9.

Zamjenik ministra koji učestvuje na sjednici Vijeća ministara umjesto odsutnog ministra, ima pravo odlučivati u njegovo ime po svim ili po pojedinim pitanjima u skladu s ovlaštenjem koje mu odsutni ministar prenese i koji o tome pismeno obavijesti predsjedavajućeg Vijeća ministara.

## III UREDI, SLUŽBE I RADNA TIJELA VIJEĆA MINISTARA

## Član 10.

Stalni i privremeni uredi i druga tijela Vijeća ministara

Radi obezbjeđenja potpunog, djelotvornog, kvalitetnog i usklađenog obavljanja poslova, Vijeće ministara osniva stalne ili privremene urede, direkcije, službe, odbore i druga tijela.





## Član 11.

### Uredi predsjedavajućeg i zamjenika predsjedavajućih

1. Za vršenje poslova u vezi s radom predsjedavajućeg i zamjenika predsjedavajućeg Vijeće ministara posebnom odlukom osniva Ured predsjedavajućeg Vijeća ministara i urede zamjenika predsjedavajućih Vijeća ministara.
2. Nadzor nad radom Ureda predsjedavajućeg, odnosno zamjenika predsjedavajućih Vijeća ministara, vrši predsjedavajući, odnosno zamjenici predsjedavajućeg Vijeća ministara.

## Član 12.

### Stalna tijela Vijeća ministara

Stalna tijela Vijeća ministara su:

- a) Direkcija za evropske integracije,
- b) Generalni sekretarijat,
- c) Ured za zakonodavstvo,
- d) Odbor za unutrašnju politiku i
- e) Odbor za ekonomiju.

Vijeće ministara će posebnim odlukama utvrditi djelokrug rada i unutrašnju organizaciju Direkcije za evropske integracije, Generalnog sekretarijata i Ureda za zakonodavstvo.

## Član 13.

### Odbor za unutrašnju politiku

1. Odbor za unutrašnju politiku je koordinirajući organ za oblasti iz djelokruga rada: Ministarstva za ljudska prava i izbjeglice, Ministarstva civilnih poslova, Ministarstva pravde i Ministarstva sigurnosti.
2. Sva pitanja iz nadležnosti ministarstava iz stava 1. ovog člana, prije rasprave na sjednici Vijeća ministara, obavezno se prethodno raspravljaju na sjednici Odbora za unutrašnju politiku.



## Član 14.

### Odbor za ekonomiju

1. Odbor za ekonomiju je koordinirajući organ za oblasti iz djelokruga rada: Ministarstva vanjske trgovine i ekonomskih odnosa, Ministarstva finansija i trezora i Ministarstva komunikacija i prometa.
2. Sva pitanja iz nadležnosti ministarstava iz stava 1. ovog člana, prije rasprave na sjednici Vijeća ministara, obavezno se prethodno raspravljaju na sjednici Odbora za ekonomiju.

## Član 15.

### Sastav odbora

1. Odborom iz čl. 15. i čl. 16. ovog poslovnika, po pravilu, predsjedava zamjenik predsjedavajućeg.
2. Predsjedavajućeg odbora i ukupan sastav odbora utvrđuje Vijeće ministara odlukom u skladu s odredbama čl. 26. i 27. Zakona o Vijeću ministara.

## Član 16.

### Način rada odbora

1. Odbori iz člana 15. i člana 16. ovog poslovnika rade u sjednicama i svoje stavove, prijedloge i sugestije daju u formi izjašnjenja.
2. Sazivanje i održavanje odbora vrši se shodno odredbama ovog poslovnika i u okviru organizacije i rasporeda poslova utvrđenih aktom o unutrašnjoj organizaciji stalnih tijela Vijeća ministara.

## Član 17.

### Služba za zajedničke poslove institucija Bosne i Hercegovine

Služba za zajedničke poslove institucija Bosne i Hercegovine vrši poslove iz tačke II Odluke o osnivanju Službe za zajedničke poslove institucija Bosne i Hercegovine ("Službeni glasnik BiH", broj: 17/99).



## IV PROGRAMIRANJE RADA VIJEĆA MINISTARA

### Član 18.

#### Program rada

1. Vijeće ministara donosi godišnji program rada, po pravilu, do početka kalendarske godine.
2. Program rada sadrži najznačajnije zadatke koje Vijeće ministara treba da izvrši u toku godine, nosioce priprema materijala, rokove za razmatranje pojedinih pitanja, a prema potrebi i kraća obrazloženja za programirane zadatke.
3. Program rada, po pravilu, sastoji se od tematskog i zakonodavnog dijela i dijela koji se odnosi na utvrđivanje međunarodne aktivnosti Vijeća ministara.

### Član 19.

#### Prijedlog programa rada

Prijedloge pitanja za program rada Vijeća ministara daju predsjedavajući, ministri i zamjenici ministara i druge institucije i tijela Bosne i Hercegovine polazeći od Ustava Bosne i Hercegovine, Zakona o Vijeću i drugih propisa kojima su utvrđena prava i dužnosti Vijeća ministara.

### Član 20.

#### Objedinjavanje prijedloga programa rada

Prijedlog programa rada Vijeća ministara priprema i objedinjuje Ured predsjedavajućeg, u skladu sa zaključcima Vijeća ministara, a na osnovu prijedloga iz člana 19. ovog poslovnika.

### Član 21.

#### Nemogućnost izvršenja programa rada

Ministarstva ili druge institucije i organi Bosne i Hercegovine, ako smatraju da ne mogu ili ako ne mogu u roku izvršiti neki od utvrđenih zadataka u programu rada Vijeća ministara, pravovremeno obavještavaju o tome Vijeće ministara, s obrazloženjem o razlozima neizvršavanja utvrđenih zadataka.



## V SJEDNICE VIJEĆA MINISTARA

Prvi dio - Opće odredbe

Član 22.

Učestalost

Sjednice Vijeća ministara održavaju se, po pravilu, određenog dana ili određenih dana u sedmici.

Član 23.

Mjesto

Po pravilu, Vijeće ministara održava svoje sjednice u sjedištu Vijeća ministara u Sarajevu, u zgradi institucija Bosne i Hercegovine, Trg Bosne i Hercegovine broj 1.

Drugi dio - Redovne sjednice

Član 24.

Sazivanje redovne sjednice

1. O sazivanju sjednice Vijeća ministara odlučuje predsjedavajući. Generalni sekretarijat obavještava članove Vijeća ministara, dostavljanjem poziva za sjednicu Vijeća ministara.
2. Predsjedavajući saziva sjednice Vijeća ministara, pisanim putem.

Član 25.

Poziv za redovnu sjednicu

Poziv za sjednicu Vijeća ministara sadrži: vrijeme i mjesto održavanja sjednice, prijedlog dnevnog reda, obavještenje o tome koji su materijali dostavljeni ranije, koji se materijali dostavljaju uz poziv, a koji će biti dostavljeni naknadno, kao i druga obavještenja i napomene od značaja za održavanje sjednice.



## Član 26.

### Dnevni red redovne sjednice

1. Predsjedavajući utvrđuje prijedlog dnevnog reda sjednice Vijeća ministara.
2. Pripremu dnevnog reda vrše ministri.

## Član 27.

### Neuvršavanje tačke dnevnog reda redovne sjednice

Predsjedavajući može odgoditi uvrštavanje određenog zakona i drugog propisa u prijedlog dnevnog reda sjednice Vijeća ministara, ako utvrdi da obrađivač nije o tom propisu pribavio mišljenje Ureda za zakonodavstvo ili drugog organa utvrđenog u članu 31. ovog poslovnika.

## Član 28.

### Materijali za redovnu sjednicu

1. Poziv za sjednicu Vijeća ministara, sa odgovarajućim materijalima, dostavlja se članovima Vijeća ministara, zamjenicima ministara, generalnom sekretaru, glavnom sekretaru Stalnog komiteta za vojna pitanja, direktoru Direkcije za evropske integracije i direktoru Ureda za zakonodavstvo.
2. Materijali za sjednicu dostavljaju se sedam dana, a najkasnije tri dana prije održavanja sjednice Vijeća ministara.
3. Materijali za sjednicu Vijeća ministara mogu se, izuzetno, dostaviti neposredno prije održavanja sjednice Vijeća ministara ako se radi o pitanjima o kojima treba odlučiti zbog hitnosti kao i na samoj sjednici Vijeća ministara.

## Član 29.

### Priprema materijala za redovnu sjednicu

1. Materijale za razmatranje na sjednicama Vijeća ministara, u okviru svoje nadležnosti, pripremaju i predlažu ministarstva i druge institucije i organi Bosne i Hercegovine (u daljnjem tekstu: obrađivač), na način utvrđen ovim poslovníkom.
2. Materijali iz prethodnog stava obavezno se prethodno razmatraju na Kolegiju ministarstva.



## Član 30.

### Dostavljanje materijala

Materijale za razmatranje na sjednicama Vijeća ministara obrađivači dostavljaju Vijeću ministara u obliku:

- a) nacрта i prijedloga zakona i prijedloga drugih propisa koje Vijeće ministara predlaže Parlamentu kao prijedloge radi razmatranja i donošenja;
- b) kada se radi o izmjenama i dopunama postojećeg zakona, uz izmjene i dopune dostavlja se i pregled odredaba koje se mijenjaju ili dopunjavaju;
- c) nacрта budžeta institucija Bosne i Hercegovine i međunarodnih obaveza Bosne i Hercegovine koji Vijeće ministara dostavlja Predsjedništvu Bosne i Hercegovine radi predlaganja Parlamentu na odobrenje i usvajanje;
- d) nacрта i prijedloga međunarodnih ugovora, protokola i memoranduma koji se dostavljaju radi zaključivanja i ratifikacije;
- e) prijedloga odluka, uputstava, zaključaka, rješenja i drugih normativnih akata koje donosi Vijeće ministara; i
- f) programa, planova, analiza, informacija, izvještaja, strategijskih dokumenata, izjašnjenja i mišljenja.

## Član 31.

### Pribavljanje mišljenja za predložene materijale

1. U pripremi nacрта i prijedloga zakona i prijedloga odluka, uputstava, zaključaka, rješenja i drugih normativnih akata obrađivač, prije dostavljanja Vijeću ministara, obavezno usklađuje njihov tekst odnosno pribavlja mišljenja od:

- a) Ureda za zakonodavstvo u pogledu njihove usaglašenosti sa Ustavom Bosne i Hercegovine i zakonima Bosne i Hercegovine i metodološkim jedinstvom u izradi propisa;
- b) Ministarstva pravde u pogledu pitanja koja se odnose na sankcije, organizaciju i funkcioniranje organa uprave Bosne i Hercegovine i njihove međusobne odnose i na pravilnike o unutrašnjoj organizaciji ministarstava, upravnih organizacija i drugih organa uprave Bosne i Hercegovine;
- c) Ministarstva za ljudska prava i izbjeglice u pogledu usklađenosti sa propisima o ostvarivanju građanskih prava i sloboda i osnovnih sloboda međunarodnog humanitarnog prava;



d) Ministarstva vanjskih poslova u postupku pokretanja, zaključivanja i izvršavanja međunarodnih ugovora;

e) Ministarstva finansija i trezora u pogledu finansijskih sredstava ako provođenje zakona, odnosno drugog propisa zahtijeva obezbjeđenje finansijskih sredstava i na programe rada ministarstava, upravnih organizacija i drugih organa uprave Bosne i Hercegovine o finansijskom aspektu programa;

f) Direkcije za evropske integracije u vezi s usklađivanjem legislativne Bosne i Hercegovine s direktivama “Bijele knjige Pripreme pridruženih zemalja Centralne i Istočne Evrope za integraciju u unutrašnje tržište Unije” i procedurama zadovoljavanja zahtjeva relevantne direktive.

2. Propisi iz stava 1. ovog člana treba da sadrže i odgovarajuće obrazloženje i izjašnjenje obrađivača povodom mišljenja ministarstava iz stava 1. ovog člana, Ureda za zakonodavstvo i Direkcije za evropske integracije.

U prilogu propisa dostavljaju se i mišljenja ministarstava, Ureda za zakonodavstvo i Direkcije za evropske integracije.

3. Kada su u pitanju materijali iz nadležnosti Ministarstva za ljudska prava i izbjeglice, Ministarstva civilnih poslova, Ministarstva pravde i Ministarstva sigurnosti, prije razmatranja na sjednici Vijeća ministara, obavezno se ti materijali prethodno raspravljaju na sjednici Odbora za unutrašnju politiku.

4. Kada su u pitanju materijali iz nadležnosti Ministarstva vanjske trgovine i ekonomskih odnosa, Ministarstva finansija i trezora i Ministarstva komunikacija i prometa, prije razmatranja na sjednici Vijeća ministara, obavezno se ti materijali prethodno raspravljaju na sjednici Odbora za ekonomiju.

5. Kada su u pitanju drugi materijali koje razmatra ili usvaja Vijeće ministara, obrađivač je dužan pribaviti mišljenje odgovarajućeg ministarstva i drugih institucija i organa Bosne i Hercegovine u pogledu dobijanja podrške o opravdanosti materijala, te iskazati finansijska sredstva za izradu materijala i realizaciju predloženih i utvrđenih zaključaka i mjera.



## Član 32.

### Obrazloženja za predložene materijale

1. Nacrt i prijedlog zakona, odnosno prijedlog odluke, uputstva, zaključka, rješenja i drugog normativnog akta priprema se i dostavlja u obliku u kojem treba donijeti zakon, odnosno drugi normativni akt.
2. Uz nacrt i prijedlog zakona, prijedlog odluke, uputstva, zaključka, rješenja i drugog normativnog akta dostavlja se obrazloženje koje sadrži:
  - a) ustavni osnov za donošenje zakona, odnosno pravni osnov za donošenje drugog propisa ili normativnog akta;
  - b) razloge zbog kojih treba donijeti zakon, odnosno drugi propis ili normativni akt;
  - c) obrazloženje predloženih pravnih rješenja i načela uređenja odnosa;
  - d) način izvršenja zakona, drugog propisa ili normativnog akta (koje provedbene propise i koji organ i u kojem roku treba donijeti s tezama za donošenje tih provedbenih propisa, odnosno mjera i akcija koje treba poduzeti i u kojem roku, kao i druga obavljanja od značaja za izvršenje zakona, drugog propisa ili normativnog akta);
  - e) ocjenu potrebnih finansijskih sredstava, izvore i način osiguravanja sredstava za izvršenje zakona, drugog propisa i normativnog akta;
3. Ako se predlažu pojedine odredbe u alternativama, obrazlažu se i rješenja predloženih alternativa.

## Član 33.

### Vremenski rok za davanje mišljenja

Ured za zakonodavstvo, ministarstva i druga tijela iz člana 31. ovog poslovnika dužni su da daju svoje mišljenje obrađivaču najkasnije u roku od deset dana od dana prijema materijala, a kada se radi o pitanjima o kojima treba hitno zauzeti stav, organi su dužni dati mišljenje odmah.

## Član 34.

### Forma dostavljenog materijala

Prijedlog propisa ili drugog normativnog akta, koji donosi Vijeće ministara, priprema se i dostavlja Vijeću ministara u obliku u kojem se donosi s obrazloženjem.





## Član 35.

### Nepotpuni materijali

Materijale koji su dostavljeni Vijeću ministara na razmatranje, a nisu pripremljeni u skladu sa ovim poslovníkom i ne sadrže mišljenja Ureda za zakonodavstvo, ministarstava i drugih tijela iz člana 31. ovog poslovníka Generalni sekretarijat vratit će obrađivaču, radi kompletiranja materijala, uz utvrđivanje roka za njihovo kompletiranje.

## Član 36.

### Propratno pismo

1. Obradivač dostavlja materijale Vijeću ministara uz propratno pismo.
2. Propratno pismo potpisuje ministar ili zamjenik ministra po ovlaštenju ministra.
3. Obradivač u propratnom pismu obavještava Vijeće ministara o tome da li je materijal izrađen po programu rada Vijeća ministara, ili na osnovu zaključka Parlamenta, Predsjedništva, odnosno Vijeća ministara i da li se materijal dostavlja radi razmatranja na sjednici Vijeća ministara ili radi informisanja članova Vijeća ministara.
4. Materijali za sjednice Vijeća ministara dostavljaju se Generalnom sekretarijatu u 27 primjeraka na jezicima u službenoj upotrebi u Bosni i Hercegovini: srpskom, bosanskom, i hrvatskom ijekavskog izgovora, ćirilicom i latinicom.

### Treći dio - Vanredne sjednice

## Član 37.

### Vanredne sjednice

Vijeće ministara može po potrebi održavati i vanredne sjednice. Vanredna sjednica Vijeća ministara saziva se najmanje 24 sata unaprijed na prijedlog predsjedavajućeg.

## Član 38.

### Dnevni red vanredne sjednice

Dnevni red vanredne sjednice sastoji se od tačaka predloženih od strane predsjedavajućeg.



## Član 39.

### Materijali za vanrednu sjednicu

Materijali za vanrednu sjednicu podnose se na samoj sjednici.

## Četvrti dio - Održavanje i tok sjednice

## Član 40.

### Javnost rada

1. Vijeće ministara saopćenjem, pres-konferencijama, izjavama i drugim vidovima informiranja obavještava javnost o svom radu i o donesenim odlukama, zaključcima i zauzetim stavovima, kao i o značajnim pitanjima koja su u toku razmatranja ili će se razmatrati.
2. Predsjedavajući Vijeća ministara može odlučiti da član Vijeća ministara i funkcioneri koji predstavljaju druge institucije i organe Bosne i Hercegovine mogu organizovati razgovore, odnosno konferencije za štampu s predstavnicima sredstava javnog informiranja o određenim pitanjima iz rada Vijeća ministara, odnosno institucije kojom rukovode.
3. Vijeće ministara može odrediti koji se materijali o pitanjima koja se razmatraju na sjednicama Vijeća ministara i njegovih radnih tijela ne mogu stavljati na raspolaganje predstavnicima štampe i drugih sredstava javnog informiranja, u skladu sa Zakonom o slobodi pristupa informacijama u BiH.

## Član 41.

### Prisustvovanje sjednicama Vijeća ministara

1. Članovi Vijeća ministara i generalni sekretar obavezni su prisustvovati svim sjednicama Vijeća ministara i učestvovati u radu.
2. Ako je predsjedavajući spriječen da prisustvuje sjednicama Vijeća ministara, predsjedavajućeg u vođenju sjednice Vijeća ministara zamjenjuje zamjenik predsjedavajućeg kojega odredi predsjedavajući.
3. Sjednicama Vijeća ministara mogu prisustvovati i zamjenici ministara, direktor Direkcije za evropske integracije, direktor Ureda za zakonodavstvo i generalni sekretar Stalnog komiteta za vojna pitanja, ukoliko ih pozove predsjedavajući Vijeća ministara.



Prisutni na sjednici Vijeća ministara iz ovog stava mogu učestvovati u raspravi, ukoliko ih eksplicitno pozove predsjedavajući Vijeća ministara.

4. Sjednicama Vijeća ministara prisustvuju predstavnici drugih institucija i organa Bosne i Hercegovine čiji je materijal na dnevnom redu, i to samo za tu tačku dnevnog reda.

5. Sjednicama na poziv predsjedavajućeg mogu prisustvovati istaknuti stručnjaci, kao i predstavnici entiteta, koji svojim prijedlozima mogu doprinijeti rješavanju konkretnih pitanja.

6. Sjednicama Vijeća ministara mogu prisustvovati i predstavnici OHR-a, međunarodni koordinator stalnih tijela Vijeća ministara i predstavnici drugih međunarodnih institucija, na poziv predsjedavajućeg.

#### Član 42.

##### Kvorum

Da bi Vijeće ministara moglo donositi odluke na sjednici, mora biti prisutno više od polovine članova Vijeća ministara, od kojih najmanje po dva iz svakog konstitutivnog naroda.

#### Član 43.

##### Otvaranje sjednice i utvrđivanje dnevnog reda

1. Predsjedavajući otvara sjednicu Vijeća ministara i utvrđuje da li sjednici prisustvuje potreban broj članova Vijeća ministara za odlučivanje, nakon čega se pristupa utvrđivanju dnevnog reda sjednice Vijeća ministara.

2. Dnevni red sjednice Vijeća ministara utvrđuje Vijeće ministara na osnovu ranije dostavljenog prijedloga dnevnog reda iz člana 26. ovog poslovnika od strane predsjedavajućeg, kao i na osnovu naknadno predloženih dopuna ili izmjena dostavljenog dnevnog reda.

#### Član 44.

##### Usvajanje zapisnika

1. Prva tačka dnevnog reda je, po pravilu, usvajanje zapisnika s prethodne sjednice Vijeća ministara. Članovi Vijeća ministara imaju pravo staviti primjedbe na zapisnik sjednice Vijeća ministara.

2. O primjedbi stavljenoj na zapisnik Vijeća ministara odlučuje se prilikom usvajanja zapisnika.



## Član 45.

### Tok sjednice

1. Razmatranje i odlučivanje na sjednicama Vijeća ministara vrši se po tačkama utvrđenog dnevnog reda.
2. O svakoj tački dnevnog reda otvara se rasprava.
3. Članovi Vijeća ministara na sjednici Vijeća ministara obrazlažu pitanja iz svoje oblasti za koja je potrebno potpunije obavještenje članova Vijeća ministara.

## Član 46.

### Razmatranje materijala na sjednicama

1. Vijeće ministara odlučuje o materijalu na osnovu prijedloga koji su dali predlagači, mišljenja Ureda za zakonodavstvo i mišljenja ministarstava i drugih tijela iz člana 31. ovog poslovnika.
2. Vijeće ministara može zaključkom odrediti da pojedini posao u vezi s materijalom koji se razmatra izvrši član Vijeća ministara, više članova Vijeća ministara, uredi, službe i radna tijela, ministarstvo i druge institucije i organi Bosne i Hercegovine.
3. Materijal koji se razmatra na sjednici Vijeća ministara može se primiti na znanje, usvojiti u cjelini, prihvatiti djelimično ili vratiti obrađivaču radi ponovne izrade ili dopune.
4. Vijeće ministara može zaključiti da se materijal dostavi Parlamentu i Predsjedništvu, radi razmatranja ili upoznavanja.

## Član 47.

### Prvo i drugo čitanje

Nacr ili prijedlog zakona, drugog propisa ili normativnog akta, koje Vijeće ministara predlaže Parlamentu po svojoj inicijativi ili na osnovu zaključka Parlamenta, razmatra se u načelu i u pojedinostima, ako Vijeće ministara ne odluči da se vodi jedinstvena rasprava.



## Član 48.

### Odlučivanje

1. Vijeće ministara donosi akte iz svoje nadležnosti većinom glasova od ukupnog broja svojih članova o svim pitanjima i temama o kojima u daljnjoj proceduri konačno odlučuje Parlament.
  2. O ostalim pitanjima Vijeće ministara po pravilu odlučuje konsenzusom, naročito o propisima, imenovanjima i postavljenjima iz djelokruga Vijeća ministara, Poslovniku i njegovom tumačenju.
  3. U slučaju da se konsenzus ne postigne, predsjedavajući Vijeća ministara saziva člana, odnosno članove Vijeća ministara koji je (su) protiv kako bi se postiglo rješenje.
- U slučaju da konsenzus ne bude postignut u roku od sedam dana ni na taj način, odluku donosi Vijeće ministara većinom glasova koja podrazumijeva i po najmanje dva člana iz svakog konstitutivnog naroda.

## Član 49.

### Glasanje

1. Vijeće ministara odluke donosi glasanjem.
2. Pravo glasanja imaju samo članovi Vijeća ministara.
3. Glasanje je javno na sjednici Vijeća ministara i vrši se izjašnjavanjem “za” ili “protiv” prijedloga. Rezultate glasanja utvrđuje predsjedavajući.

### Peti dio - Materijali sa sjednice Vijeća ministara

## Član 50.

### Zapisnik Vijeća ministara

1. O toku sjednice Vijeća ministara vodi se zapisnik.
2. O vođenju zapisnika stara se generalni sekretar.
3. U zapisnik se unosi: redni broj sjednice, dan i sat početka i završetka sjednice, ime predsjedavajućeg, imena prisutnih i odsutnih članova Vijeća ministara, imena lica koja po pozivu prisustvuju sjednici, dnevni red i zaključci doneseni po pojedinim tačkama dnevnog reda.



4. Svaki član Vijeća ministara ima pravo da traži da se njegova izjava i prijedlog unese u zapisnik.

## Član 51.

### Potpisivanje zapisnika

1. Usvojeni zapisnik potpisuje predsjedavajući, ili zamjenik predsjedavajućeg koji je predsjedavao sjednicama Vijeća ministara. Zapisnik se ovjerava pečatom Vijeća ministara.
2. O čuvanju ovjerenog zapisnika stara se generalni sekretar.
3. Zapisnik sa povjerljivim sadržajem označava se stepenom povjerljivosti na način kako su označeni materijali za sjednicu Vijeća ministara s povjerljivim sadržajem.

## Član 52.

### Distribucija zapisnika

1. Zapisnik se umnožava u potrebnom broju primjeraka i dostavlja članovima Vijeća ministara, zamjenicima ministara, generalnom sekretaru Stalnog komiteta za vojna pitanja, direktoru Direkcije evropskih integracija i direktoru Ureda za zakonodavstvo.
2. Zaključke utvrđene zapisnikom Generalni sekretarijat dostavlja ministarstvima i drugim institucijama i organima Bosne i Hercegovine na koje se zaključci odnose, radi izvršavanja zaključaka.

## Član 53.

### Magnetofonski snimak

1. Tok sjednice rada Vijeća ministara se magnetofonski snima.
2. Magnetofonski snimci sjednica Vijeća ministara smatraju se povjerljivim materijalom i materijalom za internu upotrebu, osim ako Vijeće ministara za pojedine slučajeve ne odredi drugačije.
3. Članovi Vijeća ministara mogu koristiti magnetofonske snimke sa sjednica Vijeća ministara.
4. O čuvanju i korištenju magnetofonskih snimaka sa sjednica Vijeća ministara stara se generalni sekretar.
5. Vijeće ministara može odlučiti da se sjednice, odnosno pojedini dijelovi sjednice Vijeća ministara magnetofonski ne snimaju.



## VI AKTI VIJEĆA MINISTARA

### Član 54.

#### Akti Vijeća ministara

1. Vijeće ministara u ostvarivanju svojih prava i dužnosti donosi sljedeće akte:

- a) odluke,
- b) zaključke,
- c) rješenja,
- d) uputstva.

2. Vijeće ministara usvaja:

- a) nacрте i prijedloge zakona koji se upućuju Parlamentu,
- b) analize,
- c) informacije,
- d) izvještaje,
- e) druge akte koje razmatra Vijeće ministara.

### Član 55.

#### Odluka

Odlukom se uređuju određena pitanja za izvršavanje zakona, drugih propisa i općih akata, osnivaju radna tijela Vijeća ministara, uređuju određena pitanja i određuju mjere iz okvira prava i dužnosti Vijeća ministara i vrše izmjene i dopune Poslovnika o radu Vijeća ministara.

### Član 56.

#### Zaključak

1. Zaključci sadrže, po pravilu, prijedloge konkretnih mjera, kao i radne zadatke ministarstava i drugih organa državne vlasti sa rokovima za njihovo izvršenje. Prijedlozi zaključaka, odnosno stavova datih u materijalima izlažu se u obliku u kome Vijeće ministara treba da ih usvoji.

2. Ako se kao mjera predlaže donošenje propisa ili drugog normativnog akta, prilaže se prijedlog propisa, odnosno normativnog akta.



## Član 57.

### Rješenja

Vijeće ministara donosi akte u obliku rješenja kada odlučuje o imenovanjima, postavljenjima i razrješenjima, o osnivanju privremenih radnih tijela, o pojedinačnim pitanjima, o davanju saglasnosti na opće i druge akte ministarstava i drugih institucija i organa Bosne i Hercegovine, ako je takva saglasnost predviđena zakonom, kao i u drugim slučajevima predviđenim zakonom.

## Član 58.

### Uputstva

Uputstvom se propisuje način rada ministarstava i drugih organa i institucija Bosne i Hercegovine u izvršavanju pojedinih odredaba zakona, drugih propisa i općih akata.

## Član 59.

### Nacrt i prijedlog zakona

Vijeće ministara iz okvira svoje nadležnosti podnosi prijedloge zakona Parlamentu radi njihovog razmatranja i usvajanja.

Zakon se podnosi u obliku kakav treba da se usvoji u formi prijedloga, s obrazloženjem.

## Član 60.

### Analiza

1. Analizom se, na osnovu detaljnog praćenja i izučavanja pojava i problema u pojedinim oblastima ili o pojedinim pitanjima iz određene oblasti za određeni vremenski period, potpunije ocjenjuje postojeće stanje i ukazuje na uzroke i posljedice takvog stanja.

2. Analiza treba da sadrži prijedloge zaključaka u pogledu preduzimanja potrebnih mjera ili donošenja propisa i normativnih akata i može biti potkrijepljena odgovarajućim dokumentacionim materijalom.





## Član 61.

### Informacija

Informacijom se Vijeće ministara informiše o određenim pitanjima, odnosno problemima. Informacija treba da bude sažeta, pregledna, da obuhvata podatke koji omogućavaju ocjenu određenog pitanja, odnosno problema i da, po pravilu, sadrži prijedloge zaključaka.

## Član 62.

### Izvještaj

1. U izvještaju se prikazuje rad, problemi u radu i rezultati postignuti u pojedinim oblastima u određenom vremenskom periodu, a naročito u pogledu provođenja utvrđene politike i izvršavanja zakona, drugih propisa i općih akata Parlamenta i propisa Vijeća ministara, kao i provođenja smjernica i načelnih stavova ovih organa i daje ocjena postignutih rezultata.

2. Izvještaj se podnosi i radi obavještanja Vijeća ministara o izvršenju određenog zadatka.

3. Izvještaj sadrži i prijedloge zaključaka.

4. Izvještaj iz stava 1. ovog člana podnosi se u rokovima određenim propisom, programom rada Vijeća ministara, po zaključku Vijeća ministara ili po inicijativi drugih institucija i organa Bosne i Hercegovine.

## Član 63.

### Stupanje na snagu

Odluke, zaključci, rješenja, uputstva, kao i drugi akti Vijeća ministara doneseni su danom usvajanja na sjednici, osim ako Vijeće ministara ne odluči drugačije.

## Član 64.

### Objavljivanje akata

Akti Vijeća ministara objavljuju se u "Službenom glasniku BiH".



## VII ODNOSI VIJEĆA MINISTARA S PARLAMENTOM

### Član 65.

#### Prava i dužnosti Vijeća ministara

Vijeće ministara u okviru svojih prava i dužnosti utvrđenih u Ustavu Bosne i Hercegovine i zakonu:

- a) može podnositi prijedloge zakona Parlamentu;
- b) preko svog predstavnika prisustvuje i aktivno učestvuje na sjednicama komisija i plenarnim sjednicama oba doma Parlamenta;
- c) preko svog predstavnika učestvuje na sjednicama proširenog kolegija oba doma Parlamenta;
- d) dostavlja mišljenja o prijedlozima zakona koji nisu podneseni od strane Vijeća ministara;
- e) daje odgovore na poslanička i delegatska pitanja i interpelacije;
- f) ima pravo tražiti sazivanje sjednice komisije ili doma Parlamenta da bi se razmotrilo pitanje o kojem Vijeće ministara želi iznijeti svoje stavove;
- g) podnosi godišnji izvještaj o svom radu Parlamentu;
- h) ostvaruje prema Parlamentu i druga prava, dužnosti i odgovornosti u skladu sa Ustavom Bosne i Hercegovine, zakonima Bosne i Hercegovine, ovim poslovníkom, kao i poslovnícima oba doma Parlamenta.

- a) Predlaganje zakona Parlamentu

### Član 66.

#### Redovni postupak

1. Vijeće ministara iz okvira svoje nadležnosti podnosi prijedloge zakona Parlamentu radi njihovog razmatranja i usvajanja.
2. Prijedlog zakona podnosi se u obliku teksta zakona sa članovima.



3. Uz prijedlog zakona se dostavlja obrazloženje koje sadrži:

- a) ustavni osnov za usvajanje zakona;
- b) razloge za usvajanje zakona;
- c) principe na kojima se zakon zasniva, s obrazloženjem predloženih rješenja;
- d) finansijska i druga sredstva neophodna za provođenje zakona;
- e) mišljenja institucija i organizacija koje su konsultovane tokom izrade zakona;
- f) i bilo koje druge okolnosti koje bi mogle pojasniti Parlamentu razloge za donošenje zakona.

4. Vijeće ministara prilikom usvajanja teksta prijedloga zakona odlučuje kojem domu Parlamenta će prijedlog zakona uputiti. Prijedlog zakona podnosi se predsjedavajućem onog doma Parlamenta prema kojem se prijedlog zakona šalje.

#### Član 67.

##### Skraćeni postupak

1. Kada iznosi prijedlog zakona koji nije tako složen, Vijeće ministara može zatražiti da se zakon razmatra po skraćenom postupku. U tom slučaju, Vijeće ministara dužno je da pred domom posebno obrazloži razloge koji opravdavaju skraćeni postupak.

2. Zahtjev iz stava 1. ovog člana podnosi direktno domu Parlamenta na prvoj sljedećoj sjednici. Dom će odlučivati o zahtjevu nakon rasprave.

#### Član 68.

##### Hitni postupak

1. Kada iznosi prijedlog zakona visokog stepena hitnosti, Vijeće ministara može pismenim putem zatražiti od doma Parlamenta da se zakon razmatra po hitnom postupku.

2. Zahtjev iz stava 1. ovog člana podnosi direktno domu Parlamenta na prvoj sljedećoj sjednici. Dom će odlučivati o zahtjevu nakon rasprave.



## b) Učešće u radu Parlamenta

### Član 69.

#### Prisustvo sjednici komisije

1. Vijeće ministara kao predlagač zakona dužno je putem svog predstavnika da prisustvuje sjednici komisije na kojoj se prijedlog zakona razmatra. Predstavnik Vijeća ministara u komisijskoj fazi zakonodavnog postupka izlaže mišljenje i brani stavove Vijeća ministara kao predlagača o pitanjima u vezi sa predloženim zakonom i po potrebi može predložiti materijale korištene u izradi prijedloga zakona. Predstavnik Vijeća ministara nema pravo da u ime Vijeća ministara podnosi amandmane na prijedlog zakona, niti da glasa o predloženim amandmanima.
2. Vijeće ministara u komisijskoj fazi zakonodavnog postupka predstavlja ministar ili zamjenik ministra. Kada to okolnosti zahtijevaju, Vijeće ministara u komisijskoj fazi zakonodavnog postupka može predstavljati i pomoćnik ministra.
3. Ako Vijeće ministara kao predlagač zakona propusti da prisustvuje sjednici komisije, a komisija utvrdi da je njegovo prisustvo potrebno, komisija može odgoditi raspravu o tom pitanju i obavijestiti o tome predlagača od koga će se tražiti da prisustvuje sljedećoj sjednici. Ukoliko predlagač po pozivu ne prisustvuje ni sljedećoj sjednici, smatrat će se da je odustao od prijedloga.
4. Vijeće ministara kao predlagač zakona može tražiti od komisije da prijedlog zakona povuče iz procedure u slučaju da Vijeće ministara odustane od prijedloga zakona. O zahtjevu iz ovog stava odlučuje komisija na kojoj se prijedlog zakona razmatra.

### Član 70.

#### Obavješćavanje Vijeća ministara

1. Predstavnik Vijeća ministara pravovremeno i u pismenoj formi obavješćava Vijeće ministara o raspravi i predloženim amandmanima, a nakon završetka komisijске faze i o usvojenom prijedlogu zakona u komisiji s prihvaćenim amandmanima.
2. U slučajevima kada usvojeni prijedlog zakona u komisijskoj fazi suštinski odstupa od prijedloga zakona koji je utvrdio Vijeće ministara, predstavnik Vijeća ministara dužan je o tome pravovremeno i u pismenoj formi, a u hitnim slučajevima i usmeno obavijestiti Vijeće ministara i predložiti konkretne mjere radi prevazilaženja nastale situacije.



## Član 71.

### Prisustvo na plenarnoj sjednici

1. Predstavnik Vijeća ministara u plenarnoj fazi zakonodavnog postupka izlaže mišljenje Vijeća ministara kao predlagača o pitanjima u vezi sa predloženim zakonom kada god zatraži riječ u skladu sa instrukcijama predsjedavajućeg Doma. Predstavnik Vijeća ministara nema pravo da u ime Vijeća ministara podnosi amandmane na prijedlog zakona u plenarnoj fazi zakonodavnog postupka.
2. Vijeće ministara u plenarnoj fazi zakonodavnog postupka predstavlja predsjedavajući ili jedan ili više članova Vijeća ministara. Ministre u plenarnoj fazi zakonodavnog postupka mogu predstavljati zamjenici ministara, ako to okolnosti zahtijevaju.

### c) Prisustvo u radu Proširenog kolegija

## Član 72.

### Učešće u radu Proširenog kolegija doma Parlamenta

1. Vijeće ministara u skladu sa poslovníkom oba doma Parlamenta učestvuje na sastancima ili dijelu sastanka Proširenog kolegija radi konsultacija u vezi sa dnevnim redom plenarnih sjednica.
2. Vijeće ministara na sastancima Proširenog kolegija predstavlja predsjedavajući ili jedan ili više njegovih članova. Ministre, na sastancima Proširenog kolegija mogu predstavljati zamjenici ministara.
3. Vijeće ministara putem svojih predstavnika na sjednicama proširenog kolegija može:
  - a) tražiti da se uvrsti jedna tačka na dnevni red doma Parlamenta u kom slučaju zatražena tačka će se uvrstiti na dnevni red doma;
  - b) tražiti odgađanje rasprave o jednoj neobaveznoj tački dnevnog reda kako bi zauzeo stav i iznio ga na sljedećoj sjednici, i u tom slučaju zatražena tačka će biti skinuta sa dnevnog reda doma Parlamenta.
  - d) Mišljenje Vijeća ministara o nacrtu ili prijedlogu zakona čiji predlagač nije Vijeće ministara



## Član 73.

### Mišljenje Vijeća ministara o nacrtu u prijedlogu zakona čiji predlagač nije Vijeće ministara

1. U slučaju kada se to od njega traži, Vijeće ministara će dostavljati mišljenja o nacrtima i prijedlozima zakona koji nisu podneseni od strane Vijeća ministara.
2. Po prijemu nacrtu ili prijedloga zakona Vijeće ministara će odrediti nadležno ministarstvo, koje će u roku od sedam dana po primitku materijala dati svoje mišljenje o opravdanosti prijedloga, njegovoj usklađenosti sa planom rada i politikom Vijeća ministara, finansijskim sredstvima potrebnim za implementaciju dostavljenog prijedloga.

### e) Odgovori na poslanička pitanja i interpelacije

## Član 74.

### Poslanička pitanja

1. Vijeće ministara ili bilo koji njegov član dužan je dati odgovor na poslaničko ili delegatsko pitanje (u daljnjem tekstu: poslaničko pitanje), postavljeno u domu Parlamenta. Pitanja poslanika se odnose na specifične činjenice, situacije ili dio informacije iz njihove nadležnosti.
2. Odgovore na pitanja poslanika upućena Vijeću ministara daje član Vijeća ministara kojeg odredi Vijeće ministara, nakon što je Vijeće ministara na sjednici utvrdilo odgovor.
3. Odgovore na pitanja poslanika upućena ministarstvima daje adresirani ministar nakon što je Vijeće ministara na sjednici utvrdilo odgovor.
4. Zavisno od zahtjeva poslanika, odgovor na poslaničko pitanje može se dati usmeno ili pismeno.



## Član 75.

### Usmeni odgovor

1. Vijeće ministara ili bilo koji njegov član daje usmeni odgovor na poslaničko pitanje u roku od najmanje sedam i ne kasnije od 30 dana od njegovog primitka. Obrazloženje pitanja u domu Parlamenta obaviće se u skladu i na način propisan Poslovníkom doma Parlamenta.
2. Vijeće ministara ili ministar mogu zatražiti, iz određenih razloga i samo jednom, da se rasprava o pitanju odgodi za prvu sljedeću sjednicu doma.

## Član 76.

### Pismeni odgovor

1. Vijeće ministara ili bilo koji njegov član daje pismeni odgovor na poslaničko pitanje u roku od 15 dana. Pismeni odgovor na poslaničko pitanje daje se u formi propisanoj Poslovníkom doma.
2. Vijeće ministara ili bilo koji njegov član može tražiti produženje roka od 10 dana maksimalno.

## Član 77.

### Službena tajna

Ako odgovor na poslaničko pitanje poslanika u Parlamentu predstavlja državnu ili službenu tajnu, na tu okolnost upozorit će se poslanik u Parlamentu.

## Član 78.

### Interpelacije

1. Vijeće ministara ili bilo koji njegov član dužan je dati odgovor na interpelaciju podnesenu u domu Parlamenta. Interpelacija se odnosi na stanja u pojedinim oblastima iz nadležnosti institucija BiH ili aktivnostima Vijeća ministara i bilo kojeg ministarstva na provođenju utvrđene politike.
2. Odgovore na interpelaciju poslanika upućene Vijeću ministara daje član Vijeća ministara kojeg odredi Vijeće ministara, nakon što je Vijeće ministara na sjednici utvrdilo odgovor.



3. Odgovore na interpelaciju poslanika upućene ministarstvima daje adresirani ministar nakon što je Vijeće ministara na sjednici utvrdilo odgovor.
4. Odgovor na interpelaciju daje se usmeno.

#### Član 79.

##### Odgovor na interpelaciju

1. Vijeće ministara ili bilo koji njegov član daje odgovor na interpelaciju podnesenu u domu u najmanje 15 i ne kasnije od 60 dana po prijemu interpelacije.
2. Obrazloženje interpelacije u domu Parlamenta obaviti će se u skladu i na način opisan Poslovníkom doma Parlamenta.

#### f) Informiranje Parlamentarne skupštine o aktivnostima Vijeća ministara

#### Član 80.

##### Sazivanje plenarnih i komisijskih sjednica

1. Vijeće ministara može tražiti sazivanje sjednice doma Parlamenta da bi se razmatralo pitanje o kojem Vijeće ministara želi iznijeti svoj stav i gdje bi mu bio prezentiran stav doma Parlamenta.
2. Vijeće ministara ili bilo koji njegov član će na svoje vlastito traženje ili na traženje nadležne komisije izaći pred komisiju radi održavanja informativne sjednice.

#### g) Godišnji izvještaj Vijeća ministara Parlamentu

#### Član 81.

##### Izvještaj o radu Vijeća ministara

1. Vijeće ministara jednom godišnje podnosi Parlamentu izvještaj o svom radu, a Parlament može zatražiti i vanredni izvještaj.
2. Izvještaj iz ovog člana podnosi predsjedavajući, odnosno član Vijeća ministara koga odredi predsjedavajući.





## VIII ODNOSI VIJEĆA MINISTARA S PREDSJEDNIŠTVOM

### Član 82.

#### Prava i dužnosti Vijeća ministara

Vijeće ministara u okviru svojih prava i dužnosti utvrđenih u Ustavu i zakonu:

- a) predlaže tačke dnevnog reda Predsjedništvu;
- b) priprema i preporučuje Predsjedništvu nacrt budžeta institucija Bosne i Hercegovine;
- c) provodi vanjsku politiku u skladu sa Ustavom i zakonom Bosne i Hercegovine;
- d) izvještava Predsjedništvo o svojim odlukama i drugim aktivnostima;
- e) na poziv Predsjedništva učestvuje na sjednicama;
- f) na poziv Stalnog komiteta za vojna pitanja učestvuje na sjednicama Stalnog komiteta za vojna pitanja;
- g) na zahtjev Predsjedništva saziva sjednicu Vijeća ministara;
- h) ostvaruje prema Predsjedništvu i druga prava, dužnosti i odgovornosti u skladu sa Ustavom Bosne i Hercegovine, zakonima Bosne i Hercegovine, ovim poslovníkom, kao i poslovníkom Predsjedništva Bosne i Hercegovine.

- a) Predlaganje tačke dnevnog reda Predsjedništvu

### Član 83.

#### Prijedlog tačke dnevnog reda

1. Vijeće ministara može tražiti uvrštavanje tačke dnevnog reda za sjednicu Predsjedništva da bi se razmatralo pitanje o kojem Vijeće ministara želi iznijeti svoj stav.
2. Zatražena tačka bit će uvrštena na dnevni red po proceduri utvrđenoj Poslovníkom Predsjedništva.



## b) Pripremanje nacrtu budžeta institucija Bosne i Hercegovine

### Član 84.

#### Nacrt budžeta institucija Bosne i Hercegovine

1. Vijeće ministara predlaže nacrt budžeta institucija BiH Predsjedništvu najkasnije do 15. septembra.
2. Ministarstvo finansija i trezora nadležno je da pripremi nacrt budžeta za razmatranje i usvajanje na sjednici Vijeća ministara, na način predviđen zakonom i ovim poslovnikom.

## c) Provođenje vanjske politike

### Član 85.

#### Provođenje vanjske politike

Odnos Vijeća ministara i Predsjedništva u provođenju vanjske politike određen je Ustavom i odgovarajućim zakonima Bosne i Hercegovine.

## d) Izvještavanje Predsjedništva o radu Vijeća ministara

### Član 86.

#### Informacije o radu Vijeća ministara

1. Vijeće ministara će predložiti Predsjedništvu izvještaj o izvršenju budžeta institucija Bosne i Hercegovine za prethodnu godinu.
2. U slučaju kada se to od njega traži ili na sopstvenu inicijativu Vijeće ministara će dostavljati Predsjedništvu informaciju o odlukama i aktivnostima Vijeća ministara.
3. Vijeće ministara će odrediti nadležno ministarstvo, koje će u roku od sedam dana po prijemu zahtjeva dostaviti traženu informaciju.



## e) Prisustvo sjednicama Predsjedništva

### Član 87.

#### Prisustvo sjednicama

U slučaju kada se to od njega traži Vijeće ministara ili bilo koji njegov član prisustvovat će sjednicama Predsjedništva radi obezbjeđivanja informacija i stručnog mišljenja.

## f) Sazivanje sjednice na zahtjev Predsjedništva

### Član 88.

#### Zahtjev za sazivanje sjednice Vijeća ministara

1. Predsjedništvo može predložiti sazivanje sjednice Vijeća ministara na kojoj bi se raspravljalo o pitanju od posebne važnosti.
2. Zavisno od hitnosti situacije, predsjedavajući će sazvati sjednicu u skladu s ovim poslovníkom.

## g) Učestvovanje u radu Stalnog komiteta za vojna pitanja

### Član 89.

#### Prisustvo sjednicama Stalnog komiteta za vojna pitanja

Stalni članovi Stalnog komiteta za vojna pitanja iz Vijeća ministara obavezni su prisustvovati sjednicama Stalnog komiteta za vojna pitanja.



## **IX ODNOS VIJEĆA MINISTARA S DOMOM ZA LJUDSKA PRAVA BOSNE I HERCEGOVINE I UREDOM OMBUDSMENA BOSNE I HERCEGOVINE**

### **Član 90.**

Odnos Vijeća ministara s Domom za ljudska prava i Uredom ombudsmena

Vijeće ministara, ministarstva i druge institucije i organi Bosne i Hercegovine dužni su, predstavnicima Vijeća ministara koji predstavljaju Bosnu i Hercegovinu pred Domom za ljudska prava Bosne i Hercegovine i Uredom ombudsmena Bosne i Hercegovine, pružati informacije koje su potrebne u postupcima predavljanja pred ovim domom i uredom.

## **X ODNOS VIJEĆA MINISTARA SA ENTITETIMA I BRČKO DISTRIKTOM BOSNE I HERCEGOVINE**

### **Član 91.**

Konsultacija sa entitetima

Vijeće ministara saraduje u okviru svoje nadležnosti sa izvršnim i zakonodavnim organima Federacije Bosne i Hercegovine, Republike Srpske i Brčko distrikta Bosne i Hercegovine.

### **Član 92.**

Način konsultacija

1. Saradnja Vijeća ministara sa Vladom Federacije Bosne i Hercegovine, Vladom Republike Srpske i Vladom Brčko distrikta Bosne i Hercegovine, ostvaruje se u svim pitanjima koja su od interesa za Bosnu i Hercegovinu, entitete i Brčko distrikt Bosne i Hercegovine.
2. Saradnja iz prethodnog stava, po pravilu, ostvaruje se pismenim putem ili organizovanjem zajedničkih sastanaka, pribavljanjem mišljenja o određenim pitanjima i na drugi način koji odredi Vijeće ministara.



## **XI NAČIN OSTVARIVANJA SARADNJE IZMEĆU VIJEĆA MINISTARA, MINISTARSTAVA I DRUGIH INSTITUCIJA I ORGANA BOSNE I HERCEGOVINE**

### **Član 93.**

#### **Utvrđivanje stavova**

U ostvarivanju svojih prava, dužnosti i odgovornosti Vijeće ministara može utvrditi stavove koji su obavezni za ministarstva i druge institucije i organe Bosne i Hercegovine o načinu provođenja zakona i drugih propisa Parlamenta, te propisa i odluka Vijeća ministara.

### **Član 94.**

#### **Nalog za donošenje propisa**

Vijeće ministara može naložiti ministarstvima i drugim institucijama i organima Bosne i Hercegovine donošenje propisa ili preduzimanje mjera za koje su ovlašteni, utvrditi rokove za realizaciju tih zadataka i naložiti ispitivanje stanja u oblasti iz njihovog djelokruga.

### **Član 95.**

#### **Izvještavanje Vijeća ministara**

Vijeće ministara može od ministarstava i drugih institucija i organa Bosne i Hercegovine zahtijevati redovne i povremene izvještaje o njihovom radu i izradu odgovarajućih informacija i analiza o pitanjima vezanim za provođenje zakona i drugih propisa.



## **XII NAČIN OSTVARIVANJA SARADNJE VIJEĆA MINISTARA SA VLADAMA DRUGIH DRŽAVA I MEĐUNARODNIM ORGANIMA I ORGANIZACIJAMA**

### **Član 96.**

#### **Saradnja sa vladama drugih država**

1. Vijeće ministara ostvaruje saradnju sa vladama drugih država i međunarodnim organima i organizacijama na osnovu programa koji se donosi svake godine.
2. Saradnja iz stava 1. ovog člana može se ostvariti i izvan utvrđenog godišnjeg programa kada Vijeće ministara ili predsjedavajući ocijene da je to od interesa za Bosnu i Hercegovinu.

### **Član 97.**

#### **Izveštavanje Vijeća ministara**

Predsjedavajući, ministar ili njegov zamjenik koji učestvuju u razgovorima sa predstavnicima vlada drugih država i međunarodnih organa i organizacija, podnose Vijeću ministara izvještaj o obavljenom razgovoru.

### **Član 98.**

#### **Odnosi predsjedavajućeg sa diplomatskim korom**

1. Predstavnike vlada drugih država, ambasadore i druge diplomatsko-konzularne predstavnike, odnosno predstavnike međunarodnih organa i organizacija, po pravilu, prima predsjedavajući.
2. Predsjedavajući može odrediti da predstavnike iz stava 1. ovog člana primi jedan od članova Vijeća ministara, koji je dužan podnijeti Vijeću ministara usmeni ili pismeni izvještaj o obavljenom razgovoru.

### **Član 99.**

#### **Odnosi drugih članova sa diplomatskim korom**

Članovi Vijeća ministara mogu primiti predstavnike iz člana 98. ovog poslovnika na zahtjev tog predstavnika i uz prethodno obavještenje predsjedavajućeg.



## **XIII PREČIŠĆENI TEKST I VRŠENJE ISPRAVKI PROPISA VIJEĆA MINISTARA**

### **Član 100.**

#### **Prečišćeni tekst**

1. Ured za zakonodavstvo zajedno sa obrađivačem rediguje tekst nacрта, odnosno prijedloga zakona, kao i drugih normativnih akata koje je utvrdilo Vijeće ministara, čime se obezbjeđuje da u tekst budu ugrađene primjedbe i sugestije koje je prihvatilo Vijeće ministara u raspravi.
2. Redigovani tekst propisa priprema obrađivač na jezicima u službenoj upotrebi u Bosni i Hercegovini i nakon toga dostavlja Generalnom sekretarijatu, koji, uz prpratni akt, dostavlja Parlamentu, odnosno Predsjedništvu pozivom na zaključak Vijeća ministara i prati daljnu proceduru razmatranja ovih materijala.

### **Član 101.**

#### **Vršenje ispravki**

1. Prijedlog akta za ispravku grešaka u objavljenom tekstu propisa ili drugog akta Vijeća ministara podnose ministarstvo i druga institucija i organ Bosne i Hercegovine u čijem je djelokrugu staranje o izvršavanju tog propisa, odnosno akta Vijeća ministara. Prijedlog tog akta dostavlja se Uredu za zakonodavstvo.
2. Ured za zakonodavstvo obezbjeđuje da se u “Službenom glasniku BiH” objavi ispravka grešaka u aktima Vijeća ministara.



## XIV ZAVRŠNE ODREDBE

### Član 102.

#### Amandmani na Poslovnik

Izmjene i dopune ovog poslovnika vrše se odlukom Vijeća ministara.

### Član 103.

Stavljanje van snage postojećeg Poslovnika.

Danom stupanja na snagu ovog poslovnika prestaje da važi Poslovnik Vijeća ministara Bosne i Hercegovine ("Službeni glasnik BiH", broj 7/02).

### Član 104.

#### Stupanje na snagu

Ovaj poslovnik stupa na snagu danom donošenja i objavit će se u "Službenom glasniku BiH".

VM broj 107/03

Sarajevo, 3. jula 2003. godine

Predsjedavajući  
Vijeća ministara BiH  
Adnan Terzić, v.r.





